



黃文獻集
補附
遺錄

六





集 獻 文 黃

遺 補 錄 附

(六)

撰 潛 黃

黃文獻公集卷之九上

墓誌銘

慈溪黃君墓誌銘

慈溪黃君。卒於嘉興之寓舍。其孤玠。將返柩以葬。來諗於某曰。葬宜有銘。敢以爲請。往者屬子銘吾母。而子久未及爲。幸牽聯書之。某之曾祖戶部公。與君之大父宗卿府君。同仕宋季。夙有雅故。而玠又與某託文字交。誼不得辭。君諱正孫。字長孺。姓黃氏。世爲明之慈溪縣人。曾大父諱一鸞。以子貴。贈奉議郎。大父諱震。擢寶祐丙辰進士第。歷知撫州。提舉江西浙東常平茶鹽。其在江西。又嘗提點刑獄。終於宗正少卿。積階朝奉大夫。父諱祖勉。蔭補將仕郎。母林氏。君生有美質。雅志恬靜。年十二而宋亡。卽絕意於仕進。父歿。事母盡孝。與仲父季父。患難相從。不異貲產。逮今雍睦。罄已橐嫁孤妹三人。皇慶癸丑。出遊西州。玠負笈以從。嘉興縣東魏塘之上。有義士吳君。聞君父子名。遣幣馬迎致之。君欣然弗拒。遂止居焉。君履行端粹。爲學者所尊慕。雅不喜記誦辭章之習。文成無留藁。晚自號尙綱翁。以見其志云。至正乙酉正月七日。以疾卒。享年八十有一。屬續之夕。戒其二子曰。吾祖一部州符。三持使節。泉麻葛越之衣。菜茹魚鮭之食。澹素終身。日抄等書。今方盛行。遺風餘祚。彌久弗墜。汝等善繼承之。無忝爲清白吏子孫。言畢而逝。玠奉

樞東還。卜以某月某日葬定海縣靈緒鄉澤山之阜。從先塋也。君夫人陳氏諱潤字汝玉同郡奉化人。父著宗卿府君同年進士。由太學博士知台州。公年二十出爲贅壻。居十有七年乃歸。夫人于夫婦之間。相成以道。執箕帚侍巾櫛。無違禮。治絲繭縫衣裳。無廢事。主饋食。共祭祀。無曠典。而又不憚劬勤。致養於姑。得其歡心。詩書語孟及女誡女則等篇。皆能成誦。玠方幼。口授以書。程督巖於外。傅尤喜觀易。所占多驗。間作小詩。亦有思致。嘗爲二子賦詩若干韻。有關於倫紀。可裨於治化。學士大夫咸稱誦之。君居魏塘之明年。玠卽奉夫人來就養。以泰定丁卯十二月十日卒。年六十有三。天歷戊辰九月某日歸葬奉化州剡源之三石子男二人。長卽玠。次璋。女一。今適戴幼儒。故婺州路儒學教授帥初先生之子也。孫男二人。曾紹文。女一人。曾孫男一。俊民。惟宗卿府君以直道爲時名臣。而其學一本於躬行。所著書不爲空言。以相高。公親傳家學。不自表襮。而教其子玠。克有成立。遂以文名於一時。世願罕有能知君者。銘不可以無作也。銘曰。

汲黯之直。侃侃宗卿。義方之訓。聞孫是承。戰兢自持。以孝謹稱。如萬石君。不言躬行。學以爲己。善不近名。逮爾嗣人。復用文鳴。發潛闡幽。式鴻其聲。惟石可久。薦以茲銘。

化州路儒學教授王君墓誌銘

化州路儒學教授王君諱勳字仲昭。生十歲而孤。能以禮持其身。以信義交於人。嘗產貧弗問。而護視先塋。惟謹。冠昏喪祭。必考諸古之遺制。而不苟同流俗。文字之外。無他嗜好。宗族朋友稱焉。仕未顯。輒止。而

以壽終。其賢乎人亦多矣。君嘗教授肇慶。遠郡事多率略。學有田而無籍。歲所入爲租四百石而已。君始至。喻佃人令自實稱。增其額爲六百石。廩食有餘。而俗習鄙陋。士氣弗張。使者行部。君請擇其知學而有文者。試以經術辭藝。得七人焉。上其名于宣闈。悉補儒學官。由是諸生莫不知勸。暨取士之令下。廣海數十郡。不薦一人。而肇慶首以陳祖義充賦有司。遂與中州之士。並進於春官。人皆以爲君作興之效也。君初以江山教諭。遷慈湖山長。年已垂四十。又二十年。乃拜肇慶之命。乃再調化州。而君已老。故其才不究於用。可見者若是而止。人又皆深惜之。蓋王氏上世有仕吳越爲鎮城使者。從其王歸宋。有宋日在睦州。後徙家青溪。又徙越之山陰。始居青溪者曰仁厚。於君爲九世祖。曾王父諱遂良。以恩贈訓武郎。王父諱灝。擢慶元丙辰右科。終於武經郎權發遣鬱林州事。父諱集。當用蔭得官。推與其弟。而以布衣取鄉薦。母汪氏。繼母趙氏。薛氏。而君周氏出也。自訓武府君而上。皆葬山陰。其居衢開化之馬金。則自鬱林府君始。山陰之最著者曰佐。以進士第一至某部尙書。君改葬鬱林府君于崇化鄉松公里之莊山。尙書四世孫修職郎易簡實誌之。君卒於重紀至元之歲五月十四日。年七十有七。以至正改紀之明年三月十二日。葬于鬱林府君墓左。娶余氏。先卒。子男四人。長曰墉。次曰圻。爲伯氏後。次曰塏。女一人。適單父蓋士直。孫男八人。鉅、鑑、銖、鑄、鏞、錡、鈺。女二人。適汪某、黃梓。君葬有日。塏以書抵某曰。君之子辱墻先人孫女。宜能道吾家世之詳。敢以銘爲託。某不得辭。然竊觀自昔運去物改。大家巨室。鮮不隨之。惟君之先。厚積薄發。雖閱世已久。而流澤未艾。君又廉於進取。不盡享其有。而以畀來人。可託以永存者。固不繫銘之有

無序而詩之。聊以慰君於冥冥云爾。銘曰。

有濬其源。其來不窮。用之也舒。蓄也愈豐。有沃其枝。遺澤是蒙。歸乎何憾。妥茲元宮。

承直郎潮州路總管府知事孔君墓誌銘

君諱濤。字世平。姓孔氏。先聖之四十三世。曰後周曲阜令襲封文宣公。贈兵部尙書仁玉。又二世。曰宋給事中。贈太尉道輔。又二世。曰提舉江南西路常平茶鹽公事。贈中奉大夫。傳南渡。初自曲阜徙衢州。又二世。曰迪。功郎。監潭州南嶽廟。贈少傅。行可。則君之高祖也。曾祖諱從隆。迪。功郎。祖諱應祥。從政郎。主管尙書刑工部架閣文字。入皇朝。隱居弗仕。考諱純。西安縣儒學教諭。以君貴。贈承事郎。濟寧路同知。兗州事。妣陳氏。贈宜人。君幼有異質。五歲。知讀書。八歲。能屬文。架閣公愛其警敏。俾受業。默齋留先生。間出游郡庠。別駕陳公剛。中大奇之。年二十。舉茂材異等。一時名士大夫。如永康胡先生。吳興趙公。巴西鄧公。無不器重焉。婦翁徐聖子。從事江東憲府。攜君以行。涿郡盧公。柳城姚公。前後持使者節。君皆爲之執弟子禮。由是學益進。聲譽益起。用察舉。署寧國路儒學錄。逮朝廷著取士令。延祐元年。曲阜首以君充賦。東平曹公子貞。得君所爲古文。歎賞不已。是歲。以鄉薦。上春官。所對傷太直。且微譏切主司。竟不合。用特恩。補溧陽州儒學教授。君旣新其廟學。而士多苦於徭役。爲白諸臺府。悉蠲之。七年。再貢于東平。未行。江淞行中書省辟爲掾史。曹務雖劇。君隨事緩急。關白以行。訖無所壅。杭之商稅。比歲不登。俾君趨辦。旬月而集。時宰以爲能。而風紀之司。頗欲躡尋其過誤。後乃察其無他。事遂釋。至治三年。復試東平第一。以泰定元年。

賜同進士出身。用有官超授從仕郎。平江路崑山州判官。未上。丁內艱。服除。改吳江州判官。用覃恩轉承事郎。被省檄點浙東諸倉庫。餘姚因仍前弊。糧不宿倉。官吏惶駭。莫知所爲。君知而不發。使自爲之。所糴既充。而官吏亦得自適。乃皆感服。君始視州事。囚有張甲。以擅殺盜錢乙坐逮。獄已具。君謂所殺非平民。卒貸其死。歲饑。民多事剽掠。君設計捕致數十人。謂此皆迫於凍餒而然。不可以強盜論。杖而遣之。州瀕太湖。故築埭以禦水。繕修無時。病民特甚。君爲改作。使可支久。居力以紓。水嘗暴溢。君跣禱于市橋。移時水降。人恃以無恐。而四郊之外。有溺死者。君親收瘞焉。鄰州飢。憲府俾君往賑之。全活甚衆。御史蓋公耘夫。率同院舉君治績爲諸州最。未報。會霖潦害稼。君所檢視。當免輸田租者衆。使者覆按。左右承風指。誣君私庇之。居無何。誣君者以賄敗。投遠方。而君得調桂陽州判官。天大旱。禱於神。弗答。君探獄有冤。出其無罪者三人。乃雨。廣寇竊發。君獨任軍旅供億。民不擾。而軍食亦無乏絕。州民輿轎燎雜處。素號難治。知州方思廣。以貪虐啓其爭。殺人寘弗問。反加告者罪。君與之辨。莫能直。卽日解印綬去。韓公德新乘廉車。按是州。劾罷思廣。勉君復留。君單騎直抵撩穴。諭以禍福。皆讐伏聽命。人賴以安。秩滿。遷潮州路總管府知事。用人廣陞承直郎。先是君在桂陽。感末疾而歸。疾稍間。潮州迂吏至。乘傳行次武林驛。疾復作。移寓龍山保和僧舍。一夕卒。至正二年四月十七日也。年五十有七。妻徐氏。封宜人。子男一人。思構。女三人。適張日新。陳煥。盛驎。君易簀之夕。惟思構及季女在側。發書笥。得遺訓數十百言。凡身後事。區處甚具。思構遵治命。奉柩涉江還衢州。以其年七月四日。葬西安鄉孝悌里先墓之次。初。太尉世父旣襲文宣之封。五

世至端友。與中奉公同南旋。由端友至洙。襲衍聖之封者。又五世。至元十九年秋七月。有詔令洙赴闕。架閣公以族長被命。與俱中道而返。洙獨入對。廷議俾仍嗣襲。洙力辭。乃以爲國子祭酒。提舉浙東學校。洙所居室。扁曰存齋。君惜其以存自號。而不能欽承德意。存其封爵。因自稱存存齋云。君所爲詩。尙俊逸。文渾厚。不事纖巧。有存存齋藁。未及詮次。惟闕里譜系一卷。爲成書。君九歲時。祖母黃氏有疾。露香密禱。乞減壽一紀。以延祖母之年。疾遂愈。後十年乃終。人謂君得年不永。所禱殆有徵焉。架閣公及兗州府君。相繼下世。弟洧方孱弱。君獨治葬祭。貲產皆委而不較。且援近比。請授以官。存齋之子崇安。尹楷。卒于杭。君輟錢營護歸葬。其子公溥。暨兩女。淪落民間。咸訪求得之。今公溥已強而仕。兩女亦各有家。公溥兄割地爲報。卻弗受。其孝友出于天性然也。郡文學孔某。系出永嘉。族人以其疏遠。而弗之親。適以事置對憲府。時君甫八歲。力爲求直而出之。同里徐伯潤。託其息女于君而沒。君鞠之如己子。旣長。爲嫁于士人。術士顧知幾來謁。遽以疾亡。君爲具衣衾以歛。而緘其行囊。惟謹。妻子聞訃而至。悉以授之。皆感泣。請以其術爲獻。拒弗納。有同與計偕者。見黜于有司。貧不能歸。君爲貸錢一千緡於富人。而代償之。其人後亦取進士。有祿秩。或謂可責償矣。君不聽。而焚其券。其急於人之患難。窮厄多此類。胡先生沒。君集同志之士。弔祭而上私諡焉。默齋之喪。主辦尤力。溧水州判官朱性初。與君聯事於省。尹到官未幾而卒。喪過杭。君迎致於其家。而爲位以哭。親舊皆感動。爭來歸賻。其篤於師友之誼。又如此。君與人交。驩然無間。然尙氣不阿。有過必面折之。聞者若不能堪。久乃服其識量。平生無苟取。嘗預書大藏經。有旨賜幣。亦辭弗拜。家居

不事生業有書五千卷而已。君之葬也。思構已記歲月。納諸壙。復以狀來謁銘。予繹交於君最久。且親自謂知君莫予若。而狀之所述。多予未及知者。予固不得而略也。庸備著以爲序。而銘以系之。銘曰。古有六行。以教萬民。比屋可封。孰非全人。矯矯孔君。生今之世。無待而興。六行兼備。直道以行。視險若夷。出其緒餘。卒不大施。爰擇斯藏。里曰孝悌。銘彰其存。用諗來裔。

明威將軍管軍上千戶所達魯花赤遜都臺公墓誌銘

公諱脫帖穆耳。字可與。系出蒙古遜都臺氏。其先有事太祖皇帝爲開國元勳者。曰赤老溫。名在國史。公高祖也。曾祖納圖兒。御位下必闌赤。繼領衛兵。取遼破金。屢策雋功。後攻西夏而沒於王事。祖察刺。從上親征西域。以功爲業里城子達魯花赤。又從太宗皇帝於潛邸。經略中原。立功尤多。太宗卽位。錫金符。改授隨州軍民達魯花赤。父忽納。襲前職。以隨州孤絕。洩治南陽府之昆陽。愛鄰境郟縣風土淳美。因家焉。至正十三年。世祖皇帝命相臣總兵伐宋。公以管軍萬戶實預在行。渡江後。加金虎符。爲湖廣等處行樞密院判官。南土旣平。兵寢不用。累持憲節。終於江西湖東道肅政廉訪使。以長子式列烏臺貴。贈江東建康道肅政廉訪使。又以公貴。贈通議大夫僉樞密院事。上輕車都尉。追封陳留郡侯。諡景桓。母博羅真。封汝寧郡太夫人。忽真都。封陳留郡太夫人。公以勳舊家子。蚤備宿衛。大德十年。用臺臣薦。佩金符爲武德將軍。勦縣萬戶府。東平等處管軍上千戶所達魯花赤。延祐二年。遷宣武將軍。泰定三年。轉明威將軍。分城坐鎮。自明而越。前後三十餘年。以老致事。公性至孝。陳留府君之爲湖南憲長。有德於民。其沒也。

相與繪像而祠焉。公不遠數千里求遺像以歸。事之如生存。搢紳先生皆以詩文美之。公於人有善。稱歎不容口。有不善。則爲之不擇終日。至戟手怒罵之。其善善惡惡。亦天性然也。宋南渡初。越人蔡定。父年七十餘。以事繫獄。法當贖。而吏持不可。請以身代。又不報。乃自沈於府河以死。郡守爲出其父。且給槨以葬。嗣爲郡者立廟臥龍山之麓。請勅額號愍孝。歲久廟廢。而居民侵其地。官不之省。公攝萬戶府事。慨然曰。孝子不祀。人奚以勸。會使者行部。亟以爲言。使者顧謂守令曰。承宣風厲。郡縣責也。若等寧無慙乎。卽日使歸。其侵地。廟以復完。國朝取宋之兵至天台。民婦王氏爲軍士所得。自誓不辱。至剡之清風嶺。齧指出血。題詩石上。投崖而死。流移文有司爲立廟。迄今不廢。刻有隱士吳君。與公友善。嘗謂吾死。得附葬於二戴。無憾矣。逮其旣卒。貧不能喪。公輟俸貲。倡鄉人葬於書院之側。其好義又如此。公爲人廉介質直。不喜紛華。講閱之暇。日與賢士大夫游。清言雅論。疊疊不倦。懸車之後。養高城南關齋閣。懸弓劍著壁間。聚古今圖書。布列左右。延名師教其子。每遇風日清美。輒緩轡郊外。徜徉竟日。或幅巾藜杖。命家童抱琴自隨。散步閭巷間。稚耄迎笑。扶擁而娛。亦不拒也。禮部侍郎秦不花出守越。作新學校。行鄉飲酒禮。迎致公居僎輔。公升降拜起。不愆于儀。人皆望而敬之。公生於至元二年正月三日。卒於至正四年十二月二十八日。享年八十有四。夫人哈魯氏。封陳留郡君。高氏。朱氏。俱范陽郡君。子男五人。長大都。以武德將軍襲職。東平等處上千戶所達魯花赤。次哈刺。未仕。次月魯不花。元統元年進士。累遷承事郎。南陽府穰縣達魯花赤。兼本縣諸軍奧魯勸農事。次篤列圖。至正五年進士。授將仕郎。衡州路衡陽縣丞。次完澤不花。方治

舉子業。女四人。長適宣武將軍莘縣翼上千戶齊伯顏察兒。次適朶兒伯鯁。次蚤卒。次適國子學生忽都達爾孫男七人。諸孤遵治命。奉柩歸鄉縣。卜以至正六年某月某日。葬先塋之次。示不忘本也。以潛於公父子間。有一日之雅。奉鄉貢進士趙俶所爲狀來徵銘。潛竊惟自昔帝王之興。必有命世之材。爲之股肱心膂。披攘經營。光啟鴻業。功在社稷。澤在生民。故天之報施也。往往使後人保其祿位。以承太平君子無爲之治。其德厚者其流光。豈不然哉。而况公以陳留府君爲之父。武德及穰縣衡陽爲之子。公居其間。優游自適。享有上壽。其存其歿。皆可無憾。顧潛之鄙陋衰朽。無以贊揚萬一。庸悉取狀所述爲之序。而銘之。銘曰。國家之興。必有世臣。由本而支。彌久益振。時方承平。垂衣當宁。息馬投戈。以文易武。靖共爾位。弗震弗驚。禮義干櫓。舒舒扞城。賓客在前。圖書左右。載懸吾車。長歌擊缶。我弓我冶。世適是承。爾仲爾季。人遺一經。發藻儒林。踵武相接。趨而過庭。珪重組疊。生榮死哀。雖歿不亡。式克有譽。爲前人光。瞻言故邱。返柩而耐。念茲厥初。祁連之墓。

穀城縣尉蔣君墓誌銘

故將仕佐郎襄陽路穀城縣尉蔣君諱吉相。字迪卿。其先以國爲氏。代有聞人。系序可見者。唐吏部員外郎曰則。則之子曰勳。仕吳越。爲其檢校司空兼御史大夫。始家於婺之東陽。勳三子。其仲曰承郢。承郢之子曰駟。由駟八世至君之曾大父諱顯。又卜居縣南之橫城。大父諱天廩。宋紹熙中補迪功郎。父諱沐。特達多材智。推先志立義塾。延時之鉅儒尙書侍讀方公逢辰以爲之師。後進賴其淑艾。率爲佳士。里人孫

祕承德之時。宰賈魏公似道客也。嫉其得士譽。譖於賈。復使人愬以禍福。俾獻其所蓄珍玩之物。弗爲動。則中以飛語。坐徙廬陵。賈以誤國獲罪去。乃得自便。逮世祖皇帝。統一海內。簡拔南士。可官使者。江東宣慰使左丞廉公。以其名聞。授進義副尉。南康路建昌縣主簿。年已踰六十。謝病而歸。終身不復出。君幼警敏。年十一。罹寇難。能計免。宗黨咸奇之。暨成人。循循雅飭。晦迹林泉間。以逸溪自號。示無仕進意。會廉公之壻平章政事孔公宣慰浙東。廉公念主簿公不置。屬之訪其子若孫。孔公一見君。深加器重。居館下未幾。而孔公拜湖廣行中書省左丞。尋被召。遂與俱北上。時廉公已捐館舍。孔公以見成宗皇帝。有旨令備宿衛。君驅馳兩京。侍上起居服御。以恭謹數被稱獎。孔公欲命以官。而廷議有不合。弗果用。君將南歸。值仁宗皇帝入定內難。正位東宮。因留事焉。時初置利用監。擢君爲其知事。特下令畀承事階。而執政疑非舊法。乃已。亡何以使事至閩中。感瘴癘成疾。還過蘭溪。去家僅二百里。移疾而歸。疾稍間。將遂退休。以就閑適。上旣登極。春坊寮屬。並以恩超遷。有單被者。君爲知事。時所任佐史也。亦得儀封尉。君已陞朝官。品在第八。乃止。調君穀城尉。階不過初品。人皆以銓暫失其平。謂君盍自陳。君曰。此上命也。敢計其崇卑耶。卽日就道。其縣長官。故給事於省闈。未嘗獲於君齒。一旦爲寮。而君願位其下。恆不自安。事無大小。必咨於君。兵燹後。民多非土著。往往輕生而喜鬪。其不能自業。起而爲盜者尤衆。舊以主簿兼警曹。政旣不專。人益以慢。至是設尉。君首爲之。鎮之以靜。糾之以嚴。俗爲變。而盜亦衰息。民有訴仇家縱火者。君呼其鄰訊之曰。火自內出乎。抑自外入也。乃逮其仇。屏箠楚。以情詰之。則惶恐具服。其察理之明。感物之誠。又如

此部使者聞之。欲辟置幕下。君語人曰。尉雖卑官。猶得以伸吾志。奈何持文書。俯仰偵伺。爲其所不欲哉。固辭弗就。君讀書不屑屑於章句。而能通其大義。處事之中節。殆非偶然。主簿公夫人曰劉氏。而君戴氏出也。以咸淳十年十一月辛巳。生君於廬陵寓舍。故主簿公以州名命君。甫閱月而戴氏死。旅殯廬陵。餘四十年。君每語及之。輒泫然泣下。穀城書滿。代者不至。謀於故人金同曰。奉遷改葬。是有著令。吾將由漢入江汎湖。以達廬陵。子其護吾家沿江東下。同曰。舟行千里。風濤不測。我不能獨任斯責。其俱歸而陸走衢信。以往可也。君如其言。民聞其去。皆遮道請留。委曲勞遣久之。乃羅拜而別。君旣抵家。將治行。而前所患瘴癘之疾復作。情愈迫切。飲食寢處。惕焉靡寧。疾竟不可爲。以至治元年正月丁酉卒於家。享年四十有八。臨終無他語。惟戒其子元曰。汝能返葬吾生母。吾死瞑目矣。君先娶施氏。宋國子博士郁之孫女。逾年而出。再娶朱氏。故上虞縣尹文魁之女子。男一人。元也。女四人。長適道州路總管府推官李裕。次適同邑胡珣。浦江趙友淳。金華許元。孫男四人。允同。允興。允享。允昇。女四人。先是元以泰定四年正月丙辰。葬君仁壽鄉戴初里。水齧其墓。乃以至元二年十月有二月乙酉。改葬于乘驄鄉御史里夏山之陽。虛其右以爲朱夫人之壽藏。作祠堂於墓前百步。以生母戴氏。慈母曾氏。祔食其別室。仍卜地墓旁。造窆穴。俟戴氏之柩旣返。而並瘞焉。其改葬後七年。元始奉君壻李裕所爲狀。以銘來屬。竊觀君服勤先朝。遭逢之際。亦盛矣。而不得在顯位。及隨牒外補。俛首下僚。尋常資級。猶可序進。而遽止於是。小試之效。雖班班可覩。蓋未足展其平生素蘊之萬一也。歿又無以振之於幽。可乎。庸弗讓而爲之。俾刻焉。銘曰。

士之用舍。恆係其逢。乘時捷出。或取顯融。嶷嶷蔣君。鱗攀翼附。不自奮飛。獨行其素。雨露所滯。蔚乎良材。孰尸繩墨。奮爲桷榱。有隕自天。豈不謂命。嗇不使年。莫俟其定。夏山鬱紆。清淑所鍾。兆茲新卜。以寧君躬。尙俾嗣人。飲其福澤。龍光是承。賁於松柏。

將仕郎建德錄事劉君墓誌銘

君諱環翁。姓劉氏。其先自婺之金華。徙台之寧海。居縣東北之圓風山。曾大父暠。宋文林郎昭慶軍節度判官。大父應球。宋迪功郎慶元府慈谿縣主簿。父珪。年十六。入太學。遂家於杭。仕皇朝。爲進義校尉寧海縣東奧等處海船上百戶。母陸氏。君生三年而不能言。旣成童。敏悟絕人。讀書至忘寢食。母懼其以勞致疾。禁弗與燈燭。君竊篝火閉窗隙坐。必至四鼓。年踰弱冠。出從名師受春秋學。取元統元年鄉薦。會科舉事廢。執其業不少懈。若有待者。逮今天子更新庶政。科舉復行。遂以至正四年再薦於鄉。登五年進士第。授將仕郎建德錄事。有在君弟子列而與君爲同年者。曰文宣。死於疫。君經紀其喪事無所避。因染疾。遷寓門人廉氏家而卒。五月某日也。年四十有三。君初娶費氏。前若干年卒。後娶顧氏。合卺甫五日。而君應薦北上。費氏之媵。方孕而未生也。君卒之日。手自爲書。奉束帛爲母壽。第言旦夕南歸。未幾而廉氏家以其書與君柩俱至。費氏媵之子邵祖。生已兩月。君不及知矣。母與仲兄饒翁。哀慟幾絕。時進義府君歿已若干年。猶旅殯于杭。饒翁乃啓其殯。并君之柩返于寧海。卜以某年某月某日。葬某鄉某原。且以狀來謁。銘。予筮仕寧海。聞圓風山中有兩先生。曰劉公某。曰舒公岳祥。並以文章大家。師表一時。心甚嚮往之。而

兩先生之不可作已久。賢辱交於君。乃知君於劉公爲從曾孫。舒公之子叔獻。則君所從受業也。木水本源。有自來哉。君爲人介潔不阿。然不喜臧否人物。與之游者。莫窺其涯涘。其訓諸生於杭學。具有師法。識者多以遠大期之。際逢聖時。賢才彙進。而君獨遽止於是。可哀也已。始進義府君有子年十二而夭。臨終言。我死當復爲劉氏子。後十年見夢於父母曰。我至矣。果再得子。八歲而又夭。後二年復見夢於父母曰。父母撫我厚。豈忍捨去。已而生君。遂取昔人識環事。名之曰環。而字之環翁。其再薦也。適感異夢。乃以字爲名。曰環翁云。銘曰。

不有時兮執甄而拔之。不有命兮執天而闕之。得於彼而喪於此兮。孰予而孰奪之。母倚門而啼兮。兒呱呱而泣。靈之歸兮。何嗟及。兒勉學兮。天不忘。往必復兮。後其昌。

贈奉議大夫大名路滑州知州驍騎尉追封白馬縣子王府君墓誌銘

故贈奉議大夫大名路滑州知州驍騎尉追封白馬縣子王府君。以至元庚寅八月二十四日。卒於宣城之寓舍。享年六十有八。卽宣城郭外西南岡下治地以葬。而府君元配劉氏。前十有四年卒。安厝開州已久。繼室張氏。後二十有五年卒。尙旅殯于揚州。至元後丁丑。府君之子大有。始並遷其柩。合葬于府君之墓。自爲文刻石以誌焉。初。大有爲江南湖北道肅政廉訪司知事。援著令乞推恩其父母。贈府君承務郎。大明路同知滑州事。大有張氏出也。故張氏與府君同被命爲恭人。及大有遷平江路總管府推官。而劉氏恭人之命亦下。大有旣陞五品。乃加府君以今官階勳爵。而劉氏張氏並追封白馬縣君。大有使來諗

于某曰。誌所以昭世系。謹歲月。已納諸幽堂。惟是先人劬躬樹德。以承其先。以啓其後者。宜有辭揭于墓之原。以示子孫。顧猶闕焉。敢以爲請。按王氏之先。實金之宗室。完顏氏世居磁州。有諱遠者。爲金統軍使。府君之父也。自統軍而上。遭亂失其譜。莫得而詳。府君諱思孝。字移忠。幼警悟。年方羈卯。脫身兵間。東至大名。居開之濮陽。乃易姓王氏。子孫至今因之。稍長。喜讀書。能屬文。自處甚簡薄。是時國家新取中原。海宇未一。殊無仕進意。泊天下旣平。朝野無事。可以出而仕。而府君則旣老矣。惟資其子使爲學。庶幾他日能自振拔。而大用。首以材見。推擇。尋入江東按察司爲書吏。廉訪司立。更留以爲奏差。府君委蛇就養。久之。乃以壽終。府君有子男四人。長卽大用。次珪。次大有也。今爲奉議大夫。廬州路六安州知州。兼勸農事。次大慶。女一人。壻曰會稽縣主簿郭郁。孫男九人。女五人。蓋金之將亡。大家貴族。違親戚。去墳墓。散之四方。而其後泯沒無聞者多矣。府君旣有以自全。而不墜其宗。又能教其子。至於成立。以備官使。晚乃卒食其報。豈偶然哉。矧今大有歷官。所至有聲。其在湖北。平反辰沅。常潤諸死獄。人尤以爲明允。臺府屢薦稱之。其顯融未艾。府君之宜見來崇者。不止若今所書而已。雖不克於其身。措諸事業。平生之志。尙何憾乎。序而銘之。俾後世知完顏氏之爲王氏。王氏之在宣城。皆始於府君也。銘曰。

完顏之支。別爲王氏。遠迹于南。由府君始。惟時府君。有韞弗施。一其初終。靡間險夷。保厥嗣人。使有祿位。馳恩所加。草木衣被。其升在上。神遊故墟。降形在下。兆茲坤隅。中爲同穴。昭穆左右。勒辭紀實。式示爾後。

贈文林郎江浙等處儒學副提舉許公墓誌銘

前進士許廣大爲武義之明年。以內艱去。銜哀致辭于潛曰。昔吾父之棄諸孤也。廣大年甫十有七。後八年。乃以非才。綴末第。獲備官使。又十有四年。始用例贈吾父文林郎江浙等處儒學副提舉。封吾母太宜人。廣大祇奉命書。將以告于墓下。且求時之文人。勸諸貞石。以昭先德而侈上恩。詎謂吉凶同城。吾母遽以疾不起。風木之悲。罔極奈何。忍未卽死。以終大事。願推述吾父啓慶儲祉源流之所自。及吾母爲之仗助者。合而銘之。惟許氏遠有世序。其占籍台州路之天台縣。莫詳所以徙。提學公諱嗣。字繼可。曾大父某。大父某。父某。俱弗仕。自曾大父時。以子孫衆盛。俾人專一經。故許氏明經者。代不乏人。提學公少受尙書。而於諸經無不通。然未嘗資以事進。取爲名譽。朝益暮習。皆爲己之學。其爲人純慤靜重。不妄言笑。動以禮自持。父喪。哀毀骨立。衰麻之制。哭踊之節。必求合於古。諸弟尙幼。撫育訓誨。至於成人。而授之以室。先世所遺資產。惟其所用無靳。賓祭百須。及門戶事。悉心任之。諸弟咸感化而父事焉。其教子尤篤。延師必一時名人。躬承事之。如弟子禮。寢疾病之三月。預爲詩示廣大。詩僅百四十言。而處已接物之道。靡所不該。廣大佩服不敢忘。訖能有所樹立。擢元統元年進士第。調昌國州判官。以選入行宣政院爲掾史。用資格序遷而來武義。居亡何。百廢具舉。刑清訟簡。民安其業。受知上官。見謂廉能。皆提學公之教。而宜人相之也。宜人張氏。同邑官族。提學公之歿。率諸子奉窆。窆惟謹。事舅姑以孝。治家勤儉而有法。待宗黨恩意甚至。遇貧乏必周之。諸子旣蚤失怙。宜人遵遺訓。戒厲之尤切。廣大在武義。迎至宜人就養。每晨出。必告之曰。臨事貴詳審。不可奪於私喜怒。莫歸。則詢于僕隸。有少不厭其意。輒戚戚不樂。前是武義數有水患。

謀作堤以捍之。而或者憚其勞費。先聖廟及學舍。屢徙而多未完。欲繕治崇飾之。而或者以爲非所急。廣大慨然以爲己任。宜人曰。德惠未施於人。而並興土木之役。得無爲民病乎。後知廣大以身先之。而人樂趨事。乃喜其賢有識如此。談者多謂提學公雖老於山林。而施恩所及。在其身後。一門之內。死哀生榮。可以無憾矣。潛竊觀其示廣大詩有曰。金馬誇豪貴。吾謂非世傑。惟能師古道。乃與禽獸別。然則穹官峻爵。固非其所慕。惟後之人能以斯道自任。以古人自期。乃其所望也。廣大既有以成其志。曷可無一言以慰之於泉下乎。提學公卒於泰定二年七月某日。享年四十有五。以其年十二月某日。祔葬於某鄉龍山八世祖墓次。宜人卒於至正六年七月九日。享年六十有九。以某年某月某日。合葬焉。子男三人。長卽廣大。文林郎婺州路武義縣尹兼勸農事。次彌大。喪明而卒。次小戊。方業儒。女一人。適趙景良。先卒。孫男一人。孟浩。女五人。提學公有詩若干卷。因其自號。名之曰得靜齋集。潛嘗序其篇端。以爲清高而不失乎迂。平實而不近乎俚。茲故弗論。獨序其平生大概而銘之。銘曰。

許出太岳。古之封君。後以國氏。世多顯人。公居盛時。乃不有聞。卒以不施。藏器於身。爰有淑德。媿于名門。克生材彥。孔敏而文。惟君子使。有社有民。潤澤實豐。水必有源。逝者如斯。不亡者存。龍光下賁。耀於無垠。公侯之復。在爾子孫。龍山之原。歸焉邱墳。木則已拱。合祔惟新。歸歟同穴。表以貞珉。

成全郎江浙官醫提舉張公墓誌銘

故成全郎江浙等處官醫提舉張公。諱去非。婺之東陽人。□世祖亮。與宋政和中舉八行。賜號冲素處士。

曰志行者。實兄弟行。歿葬縣南。乘驄鄉木掘嶺荷塘西原。子孫因家於荆浦。父諱潤。以修德尙義爲鄉善士。母顧氏。有子五人。公其季也。少警有敏大志。旣壯而隱於醫。其爲術深超徑詣。精驗如神。然不專於爲人。已疾尤善以太素脈言人吉凶貴賤壽夭。率皆奇中。公自號實堂。人罕用爲其稱。而直以藝配其姓。稱之曰張太素云。至元二十有六年。大盜竊發於鄰郡。蹂踐縣境。尙書左丞史公弼宣慰浙東。督諸軍討捕之。一夕氣填膈逆上。結塞脹滿。寢食併廢。公授以劑。立愈。因留置幕下。及移屯永康縉雲。皆預在行。將卒道病。與藥輒效。事平。計功行賞。當得官。公謝非其本志。不就。乃署公本郡官醫提領。史公入朝。或詢以江南名醫。必首及公。且貽書招致之。大德五年。公至京師。而史公由僉樞拜平章政事行省江西。後二年召還樞庭。見公歡甚。陛對。亟薦公于上。李叔固丞相時領太醫。奏用公爲尙醫奉御。食五品祿。明年扈從上京。阿忽都楚王疾劇。有旨命公往視之。王旣平復。入謝。上嘉獎焉。又明年。王被命巡朔漠。迴次和寧。三孫明安帖木兒有奇疾。衆醫莫知所爲。遣府僚孫司馬者。詣闕請輟公以來。公以體氣漸衰。不任遠役。懇辭。上再三勉諭。出尙方襲衣重裘。安車善馬。資之以行。仍勅有司厚贍其家。公旣至。施之鍼熨。投之湯液。閱月而疾良已。王爲之封羊刑馬。大會宗戚。餞公南還。且遣以交鈔五千緡。白金百兩。內謁者張哥司徒。復言于上。及東朝。加賜交鈔五千緡。文綺四端。以旌之。由是聲動朝野。太醫刻上其名于中書。以聞。擢江西等處官醫提舉。階成全郎。某年也。公過家上冢。卽抵官下。居三歲。職事修舉。省臺交譽之。以秩滿去官。僚屬皆泣拜而別。公性溫厚。家食之日。待鄉鄰有恩意。以疾來告者。赴其急。無難色。方將於一邱一壑。以怡

神引年。而江浙之命下矣。到官數月。俄拂衣而歸。遂以天歷元年三月二十有四日卒於家。享年八十有三。重紀至元之某年十二月某日。葬荊浦之北原。元配何氏。繼室馬氏。皆前卒。至是合祔焉。子男二人。長安道。何氏出。終於杭州路醫學教授。次至道。馬氏出。前昌國州醫學教授。俱能襲父業以醫名。女一人。適厲孫男六人。女二人。曾孫男五人。女二人。公之葬已久。而墓上之石未刻。於是至道以狀來取文爲銘。且曰。先人在京師時。至道與先兄留治家事。凡先人所遊從。與治療之曲折。言人禍福之徵應。皆莫能知其詳。所可知者。僅如是而止。先兄因赴銓。謁參知政事張公某。公言吾年尙少。求而父切脈。卽知吾後當居政路。不自意忝竊至此。而父可謂精于其術者也。今豈可復得哉。由公之言。而推其所不及知。闕軼固多矣。獨先人自序太素脈訣。出於蜀之青城山王樸仙翁。而歛人張子元子發。嘗校其書。傳至楊上善。而予得之。始奏請以行于世。其端緒之相承。可概見也。昔劉歆序七略。醫經之言人血脈經絡陰陽表裏者。黃帝扁鵲白氏內外經。及旁篇七家而已。蓋太素之書。尤祕而未出。故無得而述焉。庸備著公所序於銘文之首。庶史官傳方伎者。有考云爾。銘曰。

太素之學。古有別傳。卓哉張公。窮幽極元。爰取諸身。以知來物。活人之功。抑其仁術。帝謂斯人。醫師之良。畀以制書。歸榮故鄉。幡然勇退。遂考終命。前知孔灼。順受其正。公則遠矣。公書具存。發潛明微。在爾子孫。謁文訂實。推述源委。薦諸石章。用裨信史。

成全郎江浙官醫提舉葛公墓誌銘

公諱應雷。字震父。世爲平江人。其先仕宋季而未顯。宣義郎思恭於公爲大父。進義校尉從豫於公爲父。公少從季父某受周禮。爲舉子業。國朝取宋。場屋事廢。公無仕進意。若將終身焉。初進義府君業儒。而於九流百家。靡所不通。尤工於醫。公旣不得以文學自見。退而取家庭所聞靈樞素問諸書之說。研窮精覈。見世之言醫者。執方拘論。而莫究其源委。多與古法背馳。於是推五運六氣之標本。察陰陽升降之左右。以定五臟六腑之虛實。以合經絡氣血之流注。而知疾病之候。死生之期。其處方劑施砭熨。率與他醫異。以此名動一時。浙西提刑按察司判官李公某。中州名醫也。嘗自診視其父疾。復以咨決於公。聞公言。父子相顧駭愕曰。南方何以有此邪。則盡出所藏劉守真張潔古之書。與公討論。所見無不脗合。江南言劉張之學自公始。公所著書。大旨以爲醫當視時盛衰。劉守真張子和輩。值金人強盛。民悍氣剛。故多用宣洩之法。及其衰也。兵革之餘。饑饉相仍。民勞志困。故張潔古李明之輩。多加補益之功。至若宋之季年。醫者大抵務守護元氣。而不識攻伐之機。能養病而不能治病。失在不知通其變也。書凡二十卷。名之曰醫學會同。摘古語扁其齋曰恆。蓋用術貴於通變。立志則不可無恆也。士大夫聞公名。奉幣馬迎致之。無虛日。延譽益廣。大德十年。用薦者補平江路醫學教授。治廟宇。闢土田。教育其弟子員。後多爲良醫。尋用省臺交舉。擢江浙等處官醫副提舉。遂爲其提舉。階自醫愈郎陞成全郎。延祐五年也。公前後在官十年。其學大行於東南。至治二年。丁母憂而歸。居喪過於哀毀。如不欲生。竟以三年春正月十八日卒於家。享年六十。娶盧氏。宋某官鉞之孫女。子男二人。長震孫。先五年卒。次乾孫。女一人。適胡就矩。亦已卒。孫男四人。

公資稟和粹。識量明達。外嚴而內寬。事親孝而友愛其弟。鄉鄰有急。拯救之如恐不及。人以長者稱焉。乾孫既以泰定元年春二月二十八日奉柩葬于吳縣至德鄉望墅墩先墓之次。後十有三年。始以前宋進士顏先生堯煥所爲公行狀屬予爲之銘。予觀前史傳扁鵲倉公華佗。皆歷言其已試之效。先生狀公行。皆略弗著。惟論次其所以爲術之本。可謂善序事者也。是用悉取而備陳之。公雖寓迹方技。而未嘗廢詩禮之傳。遭時承平。復以經術網羅天下士。獨周禮爲無所用。乃俾乾孫學爲詩。以應有司之求。乾孫篤於學而敏於文。庶幾能成公之初志者。銘曰。

猗葛公抱一經。訖不試。以術鳴。帝有命。公是膺。樂其職。不近名。尙有子。蜚儒英。際聖時。伏必興。馳茂恩。耀泉扃。發其兆。在茲銘。

錢翼之墓誌銘

翼之姓錢氏。諱良右。世爲平江人。曾大父世昌。大父格。父宗慶。俱弗仕。而大父用其仲子台州路總管府判官宗顯恩。贈承事郎鎮江路丹陽縣尹。翼之生而不凡。長益闡敏。徐文貞公持浙西部使者節。台州君處其幕下。翼之因得侍公左右。公見其言談舉止。謹節有禮。大奇之。台州君同幕多名流。公語之曰。錢生濟濟有儒者意度。令親簡編。必成令器。翼之亦感勵。自力於學。公所爲詩文。必出以示翼之。其取重如此。翼之既游文貞之門。至於前代遺老。若弁陽周先生。淮陰龔先生。當世宗工。若剡源戴先生。隆山牟先生。永康胡先生。翼之無不接其緒論。中州雅望。若薊邱李公。漁陽鮮于公。暨一時賢俊之士。亦皆折行輩與。

翼之交。故其聞見最爲詳博。而吳興趙公。巴西鄧公。遇翼之尤厚。數引拔之。翼之殊無仕進意。至大中。行尚書省。署翼之吳縣儒學教諭。翼之欣然就職。已代去。輒不復出。閒居三十年。安貧守約。未始有求於人。一室蕭然。坐客常滿。詠歌酣嬉。無虛日。里中子弟來就學。亦弗拒也。御史聊城周公。舉翼之宜在館閣。未報。而中書連被上旨。擇工於書者。俾書農桑輯要。大學衍義。有司悉趨翼之。以應命。竣事。薦章交上。亦不報。浮光王公。與翼之生同歲。居同里。公由戶部尚書參預河南江北行省事。念故人之存者。獨翼之。將力援之於朝。而翼之素志邱壑。至是亦旣老矣。翼之性夷曠。與人交無町畦。篤於故舊。往來尺牘。裒輯裝治。惟謹。時出以示人曰。吾非以此術其識人之多。特以其間有情辭諄切。關於世教者。不可廢耳。然不喜於苟同。人有不善。或面斥之。以其行孚於人。不以爲異也。大參金源天公嘗問翼之曰。錢氏起。五季有吳越。子孫多在東南。且世有顯人。君豈其裔耶。翼之曰。此無從稽也。蓋某之先有甓壇沽酒者。每見故書紙。輒手拾聚而焚之曰。吾子孫其有興於文學者乎。公聞翼之言。深服其質直。翼之晚自號江村民。人因以江村先生稱之。至正四年五月八日。以疾卒於家。享年六十有七。疾已革。猶正巾危坐。秉筆作弟姪書。頃之而逝。初室徐氏。廣德縣尉逢吉之女。無子。繼室邱氏。宋龍圖閣學士贈特進岳之曾孫承奉郎稷之女。子男一人曰達。女二人。長適張元善。前卒。次適吳某。孫男某。女三人。皆幼。達旣以其月十有八日。奉柩葬吳縣靈巖鄉黃山徐涇先墓之次。而刻石誌其歲月。且遵治命以狀來徵銘。予辱游於翼之父子間甚久。別去十年。而翼之遽不可作。其以銘見屬。望予厚矣。達又好學有文。能嗣其世業。而汲汲焉用意於不朽事。

予何敢辭。翼之有詩文雜著若干卷。奎章閣侍書學士虞公已爲之序。以故弗論。翼之於古篆隸真行小草。無不精絕。豪家貴人。往往傳藏以爲珍玩。或有所挾而強使爲之。雖奉之百金弗顧也。人多以是敬服之。而罕有論其出處之大致者。序而銘之。庶幾來世有以知其人也。銘曰。

由學而升。不近乎名。旣仕而止。不失乎己。藏之若虛。以浮湛於里閭。優游卒歲。匪依隱而玩世。惟以求夫志。欲知其人。視此刻文。

饒州路儒學教授許君墓誌銘

君諱熹。字華甫。婺之東陽人。宋宣和中。睦寇竊發。八世祖瓊。聚民丁衛鄉井。被州將命赴援。有功得官。尋以城中兵食不繼。力戰而死。里人至今廟祭焉。大父諱文昌。號空雲處士。無子。弟文奎實生君。年十五。育以爲己子。處士兄弟素嚴張。君左右侍養。各盡其道。先意承志。咸得其歡心。於同產弟兩人。友愛尤篤。先世之田廬。一無所較。公上徵求百役之須。皆身任其費。子姪化之。靡有間言。異時處士兄弟從鄉先生石公游。有俊聲。後二十年。復遣君兄弟受業石公之門。君幼警敏。旣長。務以靜專自持。同門中推爲高弟。用舉者。試憲府。例當補縣教官。隨牒赴儒臺。初筮得浦江。會朝廷欲重師儒之選。俾職教一縣者。悉改調於外省。君解職以名刻上。俄又命更其法。從宣闡署置。同時捧檄而去者一百四十人。皆以次補授。序遷。間以舉子業自奮。君獨恬於進取。有司強以充賦。試不合。輒棄場屋。家食者久之。始分教於武義。再調處之麗水。丁本生親憂。服除。或謂稍增加所歷月日。則當陞。君不可。遂復調台之天台。用累考充湖之東湖書

院山長在武義。取豪民所據山塘歸於學。在天台。預鄉薦者三人。輟官俸。斥私錢。禮遣之。募好事者。捐田以助養士。東湖創於里之大家。事多繇絕。亦勸之割田附益焉。秩滿。調饒州路儒學教授。拜命而卒。臨終戒其子曰。爾等入當善事。而母出當善事。而叔父扶植吾門戶。使勿墜。他則平日誨爾熟矣。言訖而逝。重紀至元之元年十二月二十一日也。享年六十有一。六年十月四日。葬所居西北二里某鄉某原。娶劉氏。子男二人。曰怡。曰愉。女二人。壻曰王濟川。蔣世安。孫男四人。女四人。君貌擢而志儼。儼。自奉殊儉薄。而客至館穀必豐。贖必厚。產不踰中人。而輕財急義。族姻里黨。老而無依。幼而孤者。衣食之。未嫁者。擇士族歸之。歲饑。鄰里不能自活者。賑卹之。故其善日積。而家日耗。歿後。囊無餘蓄。今乃克葬。諸孤既誌歲月。求子墳諱。納壙中。仍躋門請予銘。以揭於墓道。予幸獲執弟子禮於石公。與君爲同門。知君爲深。庸摭誌所述。參以予所知。序而銘之。按東陽許氏。出晉孝子孜。孝子史有列傳。其子孫至近世愈蕃衍。居邑中者。爲西南兩族。而君之先。別居近郊之梅峴。邑居之族。掇世科。踐朝著。若以延賞入官者。數十百年相望不絕。而君之先。獨不大顯。雖能捍大患。以死勤事。後之人未有食其報者。君生今聖時。而以文學起家。人謂其將致身華要。又遭迴而不進。甫筓一命。竟不及祿。其不可哀也夫。銘以慰君。亦以告於嗣人。庶有知其委社之自。而思亢其宗者。銘曰。

九軌之涂。衆方疾驅。長裾佩玉。行之徐徐。與物委蛇。世或謂迂。銖稱寸量。月計有餘。成之匪亟。得而莫居。載其榮光。歸貢幽墟。善積于家。穰穰所儲。有謹其承。其發必舒。鸞翔鶴翥。亢其門閭。惟銘有徵。永世不渝。

鄒府君墓誌銘

無錫鄒君。以至順二年十一月二十六日卒。元統元年九月某日葬。後十有四年爲至正七年。其子師尹。乃奉故禮部尙書宛平曹公所爲行狀來徵銘。謹序而銘之。銘曰。

鄒氏之先。世居晉陵。宋有忠公。以剛直稱。正色立朝。不震不懼。元符三疏。光於史牒。子孫蔓延。散處吳中。還居錫山。家日以豐。君之曾祖。厥諱聞善。祖諱成大。再世不顯。遇事有勇。及物以仁。人憚其嚴。而懷其恩。父諱仁聲。始列仕籍。將仕初階。不有祿食。恢其先業。益厚于貲。嗇己裕人。遂大厥施。君諱德修。字曰君永。生而慧朗。長而凝靜。志學嚮方。器識愈宏。時無科目。不以文鳴。遺榮自適。優游卒歲。持身清約。不事侈麗。人有衣服。美錦織絺。君則弗御。終身布韋。人有室廬。穹檐邃宇。君則弗居。取庇風雨。推其所有。惠于宗嫗。由近而遠。卹其鄉鄰。爾弱我扶。爾匱我給。力苟可爲。靡有弗及。或觸機穽。深憫其窮。排難解紛。不自爲功。青青者筠。內虛外直。以名吾軒。用厲厥德。高蹈物表。若與世遠。行孚於衆。譽望所歸。展也吉人。宜膺多祉。六十八齡。云胡不起。君配華氏。子男一人。是曰師尹。有學有文。其孫有七。二男五女。男侃與儼。克肖其父。女適顧璋。質錢允臣。餘皆幼艾。在室未婚。泰伯之鄉。崇德之里。爲君宅兆。其葬以禮。君所結交。時之豪雉。知君最深。莫如曹公。謂君爲人。卓越醇厚。其言有徵。可垂不朽。瞻彼佳城。松柏丸丸。有子承考。謁辭圖堅。顧慚不敏。箴屬史氏。畀以刻文。昭示無止。

蔣君墓碣

蔣君敬之名宗簡。生三十有一年而死。其友王厚孫以狀述遺言來屬於予曰。宗簡生不及從子遊。死而得一言爲不朽之託。猶不死也。嗚呼。余之固陋。何足以知敬之。敬之之望。余則至矣。敢不諾。敬之上世居潤之金壇。宋南渡時。七世祖兵部尙書少師莊簡公猷始遷四明。其後多至顯官。而敬之曾大父應鼈。大父與可。父復祖。皆弗仕。母方氏。敬之幼爽敏。有雋聲。程先生端禮歸自江東。敬之以弟子禮見。留居旁舍數歲。凡天人性命之本。古今治亂得失之迹。靡不察究。郡庠延敬之爲少學師。諸生多貴游。以其年少頗易之。敬之于疑義數語而決。以文來就正。隨所治爲加潤色。頃刻數十篇。乃大悅服。尋挈其徒寓湖心僧寺。聚易詩春秋諸家之說而折衷焉。試有司不偶。輒散棄其舊作。或謂敬之不以盛壯時挾所長取祿仕。獨以古文自詭奚益。敬之笑曰。使吾理明氣充。其爲文于決科何有。不得命也。文有古今之異邪。旣而稍出游江湖間。遇臨川危素于金陵。語意合。欲偕之至京師。以母老不能去。買未見書數百卷以歸。翰林柳先生貫得敬之所爲文。擊節不已。方爲具薦牘。而敬之已屬疾遂不起。至正元年十月十二日也。貧無以治喪。天台陳廷言嘗主郡教。爲言於太守及寓公。率朋游之士合錢爲助。乃克以其年十一月某日葬鄞縣陽堂鄉桃輿先墓之次。敬之娶趙氏。有子男一人。曰僖。女二人。所著有易集義。詩答問。春秋三傳要義。總若干卷。文集十卷。藏於家。敬之爲人介潔。篤於自信。重然諾。恥爲小廉曲謹。人多稱其經學詞義。而其卓然欲有所樹立。以自附於古人者。未必盡知之也。昔之豐於材而嗇於年。如王逢原。邢惇夫輩。蓋有之矣。此兩人得臨川豫章。而其名益彰。敬之有程先生以爲依歸。視昔人可無憾。尙奚以區區之言爲。予

不讓而銘之者。姑以慰其來意云爾。銘曰。
進而未見其止。若有以爲。而今已矣。昭昭在上。其藏在此。

水西翁呂公墓誌銘

府君諱汲。字仲修。姓呂氏。呂氏於婺爲著姓。而非一族。人以其所居地望爲別。居永康縣之太平鄉者。號太平呂氏。宋之中葉。有以經學教授於鄉里者。曰遵。遵之子曰迪。功郎師愈。仇家構飛語。中其長子約。而連及之。父子同時與龍川陳公俱下天獄。次子皓。先以賑濟受知。倉使朱文公。奏補郡文學。用漕薦。再上春官。時年二十有四。叩匭上書。乞納所得官贖父兄罪。丞相白無例。孝宗正色曰。義事安用例。立命出之。緣坐得釋者五十餘人。幼子源。是爲府君五世祖。累贈通直郎。高祖諱介。曾祖諱羔。皆承節郎。祖諱堃。承信郎。父諱懋。咸淳間。嘗與計偕。試禮部。入皇朝。版授知永康縣。至元十五年也。母何氏。知樞密院兼參知政事。夢然之從孫女。府君少嗜學。至老不懈。讀書務窮理。而於百家數術。靡不旁通。其說平居致養於親。爲具必豐。族人不能自食者。月有廩。年當入學者。家有塾。列爲成規。守而不廢。子女婚嫁。必擇故家名族。未嘗論財。接賓友情文兼至。各盡其歡而止。鄰里有急。必周之。歲大祲。爲粥食餓者。所全活以千百計。至於自奉。乃極簡薄。衣無美飾。食無珍味。器用苟完。出入無僭從。唯一僮挾策自隨。人望之。蕭然山澤之癯也。其恭儉出於天性。孝友行於家。仁愛及於宗族鄉黨。可見者如此。而又多材能。遇事明敏。所處必中於理。衆咸厭服。爲人排難解紛。勇於赴義。不以爲憚。里中無賴之徒。或假私鹽誣平民。蔓延所及甚衆。

爲之力辨於官以免。人尤德之。初知縣公遭值江南新附。官府未立。毅然出任縣事而弗辭。旣撫定其民。使無失業。且爲之捍衛以備非常。人恃以安。及朝廷爲置吏。卽奉身而退。蓋志在用權以全其鄉井。不藉是爲進取之階也。其後大盜竊發。官軍進討。復強起之以爲鄉導。府君甫踰弱冠。實預在行。身踐重山密林。荒昧阻絕之境。而直探其巢穴。事平。口不言功。識者推其雅量。晚益務韜晦。自號水西翁云。前娶朱氏。鄉貢進士環之女。先四十三年卒。後娶趙氏。參知政事資政殿大學士順孫之女。先五年卒。子男三人。長曰梓。本伯兄之子。次曰權。曰機。皆朱氏所出。府君旣早失內助。二子又幼弱。因鞠兄子俾持門戶事。而悉畀以知縣公所遺田宅。權旣長。遣從鄉先生許公益之。受學八華山中。業成。未及見於用。而先府君十五年卒。無子。府君以繼體之重。爲之斬衰三年。仍命以機子烜爲之後。而機亦先府君三年卒。女二人。適同邑陳至寶。東陽胡道隆。孫男七人。熙、忠、燧、炯、燁、烜、煥。女四人。曾孫男六人。女九人。府君生於宋咸淳四年戊辰閏月三日乙卯。卒於今至正六年丙戌二月三日壬子。享年七十有九。諸孫以其年十一月三十日癸酉奉柩合葬於東陽縣西部鄉西郭先室朱氏之墓。而以狀來謁銘。昔歐陽子有言。爲善無不報。而遲速有時。予觀水心葉公銘迪功之墓。曰。治生能富。教子能賢。後溪劉公銘通直之墓。曰。宗族稱其孝弟。鄉黨敬其仁義。蓋呂氏之積累。其來久矣。至府君家益昌。而其才又有足用者。苟出其緒餘。稍自見於世。宜不止爲一鄉之善士而已。顧乃斂藏弗耀。而優游以卒歲。豈不曰爲善之報。自有其時乎。府君諸子雖早世。而曾孫蕃衍。生今昭代。必有能自致顯融。而大亢其宗者。爲之銘以勗之。且以俟也。銘曰。

有伏必興。斯理之常。惟德之厚。其流乃光。于嗟府君。隱居行義。澤施於人。而不有位。保其世德。望于一鄉。繩繩子孫。積善之祥。亦既有子。胡又天闕。百年之積。鬱而不發。是繼是述。在其孫曾。尙克有聞。天寵是承。貤恩所加。賁及窀穸。惟銘可徵。勒此貞石。

奉訓大夫婺源州知州致仕程公墓誌銘

公諱郇。字晉輔。姓程氏。其先廣平人。唐御史亮以直言忤旨。謫通義令。通義。宋眉州也。子孫家焉。高祖諱符孫。承事郎。贈太中大夫。曾祖諱公許。嘉定四年進士。官至刑部尙書兼侍讀。以龍圖閣學士致仕。贈宣奉大夫。諡忠文。始出蜀而僑居于今之湖州。祖諱子泳。贈奉直大夫。考諱繩翁。朝散大夫。將作監。入皇朝。以公貴。贈奉訓大夫。台州路黃巖州知州。飛騎尉。追封烏程縣男。妣陶氏。追封烏程縣君。公幼聰慧。又生於名家。耳濡目染。能蚤有知。年十二入鄉校。學出儕輩間。稍長。游心聖賢之學。於書無不讀。爲文博敏。閱肆有奇氣。下筆頃刻數千言。觀者莫不駭服。前代遺老。如尙書陳公存。參政文公及翁。大卿牟公巖。與公居同郡。咸器重之。用薦者。嘉興路儒學錄。丁外艱。服除。陞平江之和靜書院山長。書院故在虎邱。爲寺僧所據。旣徙置城中。豪家又欲奪而有之。賴公力爭而止。秩滿。上名中書。適值銓曹行限年法。再調紹興之和靜書院山長。書院舊有田七百畝。籍於郡學。公取而有之。用累考合格。授將仕郎。台州路儒學教授。新殿宇及禮樂之器。增置養士之田百餘畝。調將仕郎。鎮江路總管府知事。郡當南北往來之衝。前是爲幕僚者。寤於將迎。事多留滯。公獨處之裕如。遷從仕郎。衢州路江山縣尹。爲政務平易。官府日益無事。以

餘力造舟濟行者。且買田百餘畝。使爲久遠計。使者行部。郡守縣令。多坐事免。公獨以廉介見禮遇。再遷徵事郎。武岡路綏能縣尹。縣鄰於谿峒。民夷雜處。竊發不時。公附循以愷悌之政。人咸感化。境內以安。會廣寇猖獗。犯全道兩州。長貳而下。以供億軍需出境。公獨任縣事。師旅經從。枝梧遣發。戒令嚴明。士卒帖帖不敢肆行。省檄發屬郡民兵。公選義勇應之。皆慷慨赴敵。戰數有功。縣有義倉糧二萬餘石。積爲豪強所侵。公悉徵理之。歲適大祲。賴以全活者甚衆。有僞鈔獄十年不決。公力辯其非辜。旣而朝廷遣官慮囚。閱其始末。見稱明允。陞承事郎。慶元路慈溪縣尹。慈溪密邇帥閫。事尤叢劇。公設施注措。若不經意。咸盡其宜。縣故以食鹽額重爲民病。公規畫有方。賦足而民不困。縣東花嶼蓀湖受諸水。溉田可六十頃。豪民或請墾湖爲田。而輸糧於官吏。以成案請署。公毅然不可。事遂寢。湖旁農家乃均獲其利。公三爲縣。洊事之暇。尤垂意於庠序之事。年垂七十。預請納祿。遂以奉訓大夫徽州路婺源州知州致仕。公旣歸老於家。杜門不出。手植五柳于前庭。扁曰柳軒。舍下環以松菊。時與諸老留連觴詠。置家事不問。四方來求文者。應酬無倦色。有柳軒退藁十卷藏於家。俄感微疾。旣痊而復作。卻藥謝醫。談笑如平日。忽命具湯沐。斥女侍呼子孫立左右。端坐而逝。公生於宋咸淳己巳四月一日。卒於今至正六年七月二十五日。享年七十有八。娶史氏。中書舍人某之孫女。封烏程縣君。子男四人。長游。兩浙都運鹽使。司海沙場鹽司管勾。次濤。次洽。次潛。女一人。適孟良實。孫男八人。權。模。楷。植。楫。同生。文孫。住。孫女七人。曾孫男一人。游等遵治命。以是年十月二十九日。奉柩葬於烏程縣永新鄉桃塢先塋之旁。公爲人溫良易直。未嘗高自標榜。與人交

無畦畛。與後生談前朝文獻。歷歷如指諸掌。喜誘人爲善。不深於疾惡。故賢者親而愛之。不賢者敬而畏之。初。龍圖公事宋理宗。爲兩制侍從。權臣妨國。儉黨盈庭。鋤姦衛良。靡遺餘力。凡五立朝。而五速煩言。每一去國。更得盛名。公際遇聖世。朝廷清明。而又恬處下列。得以從容進退者。與龍圖公所遭之時異也。某幸嘗辱登公之堂。而接聞公之緒論。游等又不遠數千里。奉國子助教宇文公諒之狀來徵銘。誼不敢辭。銘曰。

程顯唐世。由御史君。龍圖仕宋。乃振於文。危言正色。匪躬之故。寧與百壬。更起迭仆。高風盛德。增光前人。垂休委祉。逮其曾孫。以名師儒。爲賢長吏。視龍圖公。世殊事異。非有盤錯。利器焉施。長歌鼓缶。式全其歸。人之所瞻。百年喬木。世其家者。是似是續。

承務郎杭州路富陽縣尹致仕倪公墓誌銘

公諱淵。字仲深。姓倪氏。其先汴人。宋靖康時。五世祖南。以武弁扈從。南遷於錢唐。四世祖某。又徙家烏程。故今爲湖州人。曾祖後民。弗仕。祖椿年。用同知樞密院事。謝公堂。奏補官。終於某路兵馬監押。父守真。輕財尚義。鄉稱善人。入國朝。以公貴。贈承務郎。松江府判官。母濮氏。贈恭人。公生而卓異。精敏絕人。讀書過目成誦。德祐失國。科舉事廢。公年甫九歲。猶能習爲其文。旣長。乃弃去。而刻意聖賢之學。三山敖先生繼翁。深於三禮。而尤善易。公從之游。於節文度數之詳。辭變象占之妙。靡不博考洞究。參知政事文公。大理少卿牟公。皆前代遺老。莫不器重焉。用薦者。署本郡儒學錄。高公克恭。持風裁。慎許可。時爲江浙行省左

右司郎中聞公名欲識之。一見與語，降歎不已。曰：君大才不可小用也。及爲南臺治中侍御史，首以放先生及鄧公文原、陳公康祖、姚公式與公五人並薦於朝。未報而行省調公杭州路儒學正，河南王李憐吉、饒嘗受業魏國許文正公之門，方以平章政事行省江浙，聞公講說大契其意，卽遣子從公受學。且移文中書，舉公可教國子，而中書已定擬臺章所薦五人各補郡文學，乃以公爲杭州路學教授。視事伊始，承歉歲之餘，倉庾枵然，絃誦息響，適嗣歲小稔，則量入爲出，節縮浮蠹。旣又復民間冒沒之田爲米三百石，費用稍充，乃嚴飭從祀，補造祭器，自禮殿論堂書閣至官屋室，皆一新之。先是列郡釋奠，多用俗樂，公訪得故大常樂工兩人，俾以雅樂教諸生，胄監聞之，因招致兩樂工爲國子樂師。今諸郡備金石之樂，實自公倡之。秩滿當改調，於是高公已爲吏部尙書，舉公可任史事，中書左丞高公昉前在行省，雅知公，卽欲處以編摩之職，公微聞之，亟具啟事以親老乞便養，遂以公爲湖州路儒學教授。未上，丁外艱，服除，中書左司都事王公克敬知公不樂遠宦，諭詮曹授以元缺，復需次于湖州，家食者十有五年，恬然若與世相違。泰定丙寅，江南三省交聘公校文鄉闈，使者同日至，公辭不獲，遂應江浙之命，士論翕然歸之。湖學自虞君志道主教事，重構先聖殿，而朽蠹藻績，多待公始完。旣又葺稽古閣，改建講堂，考安定先生湖學舊法，列經義治事諸齋，以惠來學。又創仁智軒爲其游息之所，其後學者爲公立生祠。公移文止之，不得躬往，撤之用累考入流，授將仕郎太平路當塗縣主簿。時長官皆以故免去，公獨理縣事，延祐初，經理田土，考覈多失其實，賦斂不均，公私咸以爲患，公爲分畫編次，以爲圖籍，出其隱匿，而去其增加，二稅乃如期。

而集。縣有定塘。既田可十頃。豪家據而大之。民以病告。中書下其事于版曹。議以還民。吏憚豪家。莫敢奉行。或告□□□□之。和州民有田在縣境。富家與爲交易。券成而負其直。民訟于官。而富家執券自辨。有司莫知所裁。乃越江來訴。公探得其情。始懼而以其直歸之。縣民立異姓爲後者。所後父母沒已久。有非其族而姓偶同者。賂吏給憑改立。而監奪其貲產。公焚其憑而釐正之。里父老數十人羅拜馬前曰。公神明之政也。歲適大祲。民以狀言災傷。郡戒縣勿受。公爭之不得。卽解印求去。郡中驚悟。遣吏謝公。且以檢視之事悉委之。公躬履阡陌。不避其勤。民賴以甦。元公永貞爲江東廉訪副使。巡歷而還。謂其使王公士熙曰。吾分按太平池州。廉能吏惟一當塗主簿而已。王公亦素知公。聞之喜。力薦公才堪風憲。元統乙亥。江浙行省參知政事李木魯公狃復聘公司文衡。禮遇尤至。部使者舉公可上縣令。而公以年垂七袞。告老而歸。授承務郎杭州路富陽縣尹。致仕。公天資粹美。而輔之以學。造次必由於禮。家人未嘗見其有惰容。居官朝出。晝事。暮歸讀書。課子弟。或至夜分不寐。少嘗從星官歷翁治其術。運算尤精。既老于家。杜門罕與人事接。潛心於易。著易集說二十卷。圖說序例各一卷。十年之間。精力盡在是書矣。公寡嗜欲。善攝養。老而氣貌益充。無衰憊態。俄以疽發背而卒。病已革。猶置易說於几案間。時諷誦之。語其子曰。死期至已。夫復何言。須臾儻然而化。至正五年夏六月二十九日也。娶鄭氏。先十八年卒。贈恭人。子男三人。長驥已卒。次駿。松江府儒學教授。次駮。女二人。長適楊福孫。亦已卒。次適陸元瑾。孫男六人。長璨。用公磨爲紹興路錢清務副使。次璠。瑛。瑛。瑛。女三人。曾孫男二人。女二人。公昆弟四人。伯叔季皆早世。叔有遺孤。

甫四歲撫而教之。踰於己子。伯季皆無嗣。則以駿。駉爲之後。駿等遵治命。以其年冬十月某日。奉柩葬。烏程縣德政鄉毗山先墓之次。與鄭恭人同兆域。後四年。乃命璫走京師。屬某爲之銘。蓋高公所薦五人。惟鄧公掌制命。侍經幄。仕最顯。公雖與有民社。而未足以展其材。餘三人又僅止於文學掾。然皆能脫略名迹。而以道義相高。有識之士。莫不服高公之知人。而嘉五人之不負所舉也。五人相繼下世已久。今天子以鄧公先朝舊臣。用臣僚奏請。特賜以神道之碑銘。而某以門生忝被上旨。輿聞論撰。茲又執筆而銘公。一時之人物。至是凋落盡矣。何能無感愴於斯文也哉。銘曰。

知人之明。古以爲難。聲求氣應。夫豈偶然。公初有逢。連茹而進。孰不望公。爭翔競奮。大道甚夷。公行徐徐。旣揚其英。發而不舒。白首一官。老於文學。本闡聖謨。以開後覺。晚乃佐邑。未究所施。俄復引年。納祿而歸。加恩增秩。不煩以事。鼓缶而歌。優游卒歲。儲祉則豐。畀于來昆。尙克自振。益亢其門。史氏作銘。言無溢美。寫之方珉。揚芬千祀。

中憲大夫淮東道宣尉副使致仕王公墓誌銘

公諱良。字止善。姓王氏。越之諸暨人。曾大父諱天祐。大父諱一榮。俱弗仕。父諱理。用公貴。累贈朝列大夫。祕書少監。騎都尉。追封太原郡伯。母祝氏。方氏。並追封太原郡君。所生母厲氏。贈宜人。公少受業郡庠。篤行勵學。克自植立。每慨然以康濟爲志。故祕書少監凌公時中。爲江北淮東道肅政廉訪司知事。雅知公。辟爲書吏。督辦富安場歲課。場距海遠。潮不時至。鹽丁負水取滴。力疲而賦不充。乃爲相其地形。鑿渠以

通海潮。公私咸便之。考滿。調將仕佐郎。廬州錄事司判官。淮東道宣尉使。司辟爲令史。掌織染之事。所轄官府久廢不治。乃日臨視之。爲修作坊。募工匠。至於攻金治絲設色。具爲區處。迄今守爲成法。兩淮鹽綱。病於運河淺澀。事聞。詔遣都水監官疏治之。公從分閘至淮安之鹽城。有司部役夫三千。束手以俟。都水之來。公言不宜坐靡日食。促令興工。仍立法每十夫一治炊爨。九操舂錘。日所穿廣四丈。修一丈。深五尺。比都水至。河可通舟者已四十五里。遂自新興五祐兩場。屬于高郵。次第訖功。而他州役議猶未定。乃俾悉用公法行之。調將仕郎。峽州路總管府知事。入江浙行中書省爲掾史。會朝廷遣使復立諸市舶司。公從之。至泉州。建言若買舊有之船以付舶商。則費省而工易集。且可絕官吏侵欺培克之弊。中書報如公言。凡爲船六艘。省官錢五十餘萬緡。升承事郎。建德路建德縣尹。以方郡君憂。不赴。服闋。擢兩浙都轉運鹽使。司經歷。越守王公克敬。以郡民苦於計口食鹽。言于行省。未報。而王公爲轉運使。乃俾與新守于公九思集議。咸謂宜稍損其額。以紓民力。沮之者率以爲有成籍不可改。公毅然曰。民實寡而強賦多民之錢。今死徙已衆。顧重改成籍而輕棄民命乎。且浙右之郡。商旅輻輳。未嘗以口計也。移其所賦。散於商旅之所聚。何不可乎。於是議歲減越鹽五千六百餘引。俄有旨改畀王公以湖南憲節。後運使復排前議。公以去就與之爭。丞相脫歡答刺罕公聞之。亟遣留公。而議遂定。被本司檄分治浙東。力除私販誣指之害。按劾書吏奏差尤無良者黜之。所徵贓爲錢萬六千餘緡。懼而以贓自首者。爲錢萬三千七百餘緡。丁少鹽公憂。服闋。擢海道漕運都萬戶府經歷。越之官糧。入海運者十萬石。城距海十八里。歲令有司拘民船。

以修短送舟人爲之失業。不足則勒陸居之民。厚直轉僦以給之。程期峻急。吏胥得並緣以虐民。及至海次。主運事者。又不卽受而有折閱之患。公抗言曰。運戶既有官賦之直。何復爲是紛紛也。衆莫能奪。乃責運戶自贖。知送之舟。運艘爲風所敗者。例當覈實。而除其所陷之糧。文移往還。連數歲不絕。公取吏牘。躬自披閱。除其糧二十五萬二千八百餘石。鈔二百五十二萬二千五百餘緡。布囊一萬九千有奇。而運戶免於破家。遷承務郎揚州路總管府推官。以厲宜人憂。不赴。服闋。除江浙行中書省檢校官。有詣中書訴松江富民瞿氏。包隱田土爲糧一百七十餘萬石。沙蕩爲鈔五百餘萬緡者。乞立行大司農司勸農營田水利總管府。以糾察追收之。中書移行省議。擬遣方四員。踏視其地。而松江地當什九。公至松江。七日而歸。援古證今。條陳曲折。以明其妄。且言其意不過欲多椿田蕩鈔。以竦朝廷之聽。而報宿怨。請創設牙門。爲徵名爵之計耳。萬一民心動搖。患生不測。豈爲國家培養根本久安長治之策哉。同列聞公言。皆相顧失色。公處之泰然。他所遣官聞公歸。亦皆還行省。以公言上于中書。事遂寢。遷廣州市舶提舉。輟俸資造庫屋。舶商欣然出私錢爲助。不踰月而告成。先是吏胥恣爲姦利。凡舶貨擇其善者出而售之。不善者積久不售。公始爲設法均配。立號募商人。掣籤取物。庫藏爲之清。居數月。除江西行中書省左右司員外郎。吉之安福州。有小吏誣其民欺隱詭寄田租九千餘石者。初止八家。前後四十年。株連至千餘家。行省數遣官按問。吏已伏其虛誑。而司屬之喜功生事者。復勒其民具報。實有合徵之糧六百餘石。憲司累援詔條革撥。莫能止也。公到官。首言是州之糧。比元經理已增一千一百餘石。豈復有所謂欺隱詭寄者乎。准

憲司所擬可也。行省用公言悉蠲之。州人相率爲生祠以報。撫之金谿。有陸氏三先生祠堂。豪民據其屋而奪其田。陸氏子孫三走訴於京師。竟不得直。公按其籍。使悉歸之。公所至輿除利害多此類。其詳見於省臺薦牘。及安陽韓先生國子監丞陳君旅諸公所爲善政記。惠政歌者。不可殫舉也。公在江西歲餘。年甫六十有六。拂衣徑歸。遂以中憲大夫淮東道宣尉副使致仕。家食者五年。扁所居室曰止齋。仍自號鷄游子。以見其志云。公質貌魁梧。心地磊落。讀書務明理。以致用。不苟事言說。爲名高。弱冠時。出游錢塘。與浦城楊君載。鄆州劉君汝。友善。論作詩宜取法古人之雄渾。而脫去近世萎蕪之習。間挾其所爲文。登諸大老之門。最爲隆山牟先生。永康二胡先生。趙文敏公。鄧文肅公所賞識。公處家庭。澁官臨民。各盡其道。平居慎重寡言。故言必有中。至於委蛇進退之際。莫可得而瑕疵。人尤以爲難能。卒于至正八年正月癸亥。其將終也。神完志定。無異平時。正冠肅容。端坐而逝。享年七十有一。以其年七月丙申。葬於州東長寧鄉之龍隴。娶劉氏。封某郡君。子男三人。長仲揚。用公廕爲揚州路如臯縣主簿。次仲廬。福建道宣尉使司都元帥府令史。次仲淮。大寧路儒學正。前卒。女三人。適方泗。陳嘉績。虞尙忠。孫男十一人。女七人。公葬之明年。某以久居詞林。老不任事。納祿而歸。抵家甫一日。而有召還之命。於是仲揚。仲廬。相與謀。來請文爲銘。而使者與仲廬至同日。敦迫有嚴。未遑卽如其請。載念某納交于公踰四十年。知公爲深。不可以遂已也。乃以退直之暇。追記其所可知者。論次而顯詩之遺焉。銘曰。

惟士先志。惟官先事。志不可奪。事乃有濟。表表王公。時之偉器。抱負千里。出僅一二。謁蹶而趨。劬躬盡瘁。

拾級而升。不懈於位。好是正直。周而不比。表裏洞達。初終一致。古今殊時。學與政異。公起文儒。敏於吏治。詢其職業。匪專撫字。士飫其德。民酣其惠。所去見思。如古循吏。沒世不忘。仁言之利。修塗九軌。方駕而稅。用雖未竟。志則已遂。薦斯銘詩。賁于封隧。有之似之。在爾來裔。

黃文獻公集卷之九下

墓誌銘

贈太常博士危府君墓誌銘

府君諱永吉，字德祥，姓危氏，撫之金谿人。年五十有七，以致和元年夏四月壬戌卒於家。秋七月甲申，葬白馬鄉范田之原。其子素博學而有文，間出游京師。一日，隱然名動公卿間，莫不交口薦譽之。今天子稽古圖治，誕開經筵，卽以素爲檢討。未幾，上復用言者，建白妙選儒臣，纂修三史。又以素爲史官，史事旣畢，中書奏以素爲國子助教，用資歷及恩例階承事郎，遂追贈府君承事郎太常博士。至正六年也。其年冬，素由助教遷應奉翰林文字文林郎，同知制誥，兼國史院編修官。而某以退休之餘，蒙恩召入，寓直詞林。與素命同日下，而同官爲僚，且有平生之雅。素以墓道之銘來屬，誼不得辭。按狀，危氏出於姬姓，其先自洛徙汝南，又徙江南。唐泉州錄事參軍凝有子曰巨，銀青光祿大夫檢校刑部尚書洪州別駕。巨之子曰全諷，曰仔倡，居撫南城。當江淮寇盜充斥之時，合鄉人立壁壘以自衛，而大破賊兵。朝廷因命以官。全諷，金紫光祿大夫，檢校司徒守撫州刺史，兼御史大夫。上柱國，錢唐縣開國男。累加太傅，封南庭王。仔倡，特進檢校太師，虔州防禦使，守信州刺史。汝南郡開國侯。仔倡後歸吳越，子孫皆仕於其國。賜姓元氏。宋之

盛時起進士至大官者。參知政事太子少保章簡公絳爲最顯。而危氏在南城者。皆祖全諷。由南城徙金谿。則自全諷六世孫恂始。恂五世孫光大。有子曰鼎臣。府君之高祖也。曾大父諱時發。宋贈承事郎。大父諱炎震。景定三年進士。調吉州司理參軍。治獄明允。用舉者改秩。以通直郎知臨安府仁和县事。年未六十。以不能媚權臣。乞休致而去。父諱龍友。入皇朝。爲潮州小江等處鹽司。母劉氏。府君好讀書。而深於易。工於詩文。聞儒先格言。輒書於屏間。以自厲。事親盡孝。小江歲課不登。督責甚峻。不憚竭力服勞。傾私財以紓父之急。母病。刲股和藥。仍籲天願減己年益母壽。徙居雲林三十六峯也。惟身服田畝。以爲養。而薄於自奉。一布裘至十年不易。歲凶。出粟賑其鄰里。而爲粥以濟路人。不知計家有無。學問之餘。兼善於醫。有醫說一卷。傳於學者。平居氣剛而和。警敏善料事。親故有過。必加規正。有患難。必力排解之。素過庭之際。嘗告之曰。世有學未充而已爲利祿計者。旣得之。又恐失之。竟何爲哉。汝其求師取友。痛自修飭。期無愧於古人。貧賤乃士之常。不足念也。素出告反面。問孰與遊。聞其賢也。則喜。否則必深戒焉。晚過九江。登廬山。有終焉之志。無何而屬疾。遂不起。娶同里鄧氏。忠義社統領克志之孫女。今封宜人。再娶建昌黃氏。奉訓大夫瑞州路總管府判官順翁之女子。男七人。素爲適長。黃出也。今改擢宣文閣授經郎。次蒼。次白。次丹。次赤。次會。次點。女二人。適陸鉉。傅權。孫男二人。次旂。女一人。府君之墓。素自爲阡表。稱道先德甚具。而未及敘其世系之詳。至於贈典所加。又在其十有五年之後。是用備著之。不嫌其詞之繁而不殺也。素方進用於時。所以爲親榮者。未知其止。固當屢書不一書。姑爲之銘。俾刻以俟焉。銘曰。

危出于姬顯于唐。伯仲並起尸一方。或變其姓後乃昌。爲宋鉅人司文章。綿綿大宗多才良。仁和身退名愈彰。垂芳奕葉逮太常。有子承者沒不亡。發於皇朝耀休光。賁以命書煒煌煌。增高益崇未渠央。琢石以俟于其藏。

將仕佐郎台州路儒學教授致仕程先生墓誌銘

先生諱端禮。字敬叔。姓程氏。其先遠有世序。而譜牒莫詳。所可見者。漢有海西令曾。唐有太子左衛率府冑曹參軍某。其自番陽徙家于鄞。則由冑曹之大父珍始。故今爲慶元之鄞縣人。歷五代至宋。仕者恆弗絕。曾祖振父。承務郎平江府百萬倉司門。祖在孫。通直郎知平江府常熟縣事。父立。鄉貢進士。入皇朝。贈從仕郎郊祀署丞。母王氏徐氏。並封宜人。先生徐氏出也。初用舉者爲廣德之建平。池之建德。兩縣儒學教諭。歷信之稼軒。建康之江東。兩書院山長。用累考及格。上名中書。授鉛山州儒學教授。秩滿。遂以將仕佐郎台州路儒學教授致仕。其在建平。與舉廢墜。諸生之貧者必周給之。縣尹王君起宗。日率僚友。聽其論說。且築室赤巖上。命其子楚鰲受業焉。楚鰲後出入臺閣。卒爲時之名人。繼王君爲其縣者。復倡好事之家。爲買書萬卷。覆以傑閣。永康胡先生長孺記之。其在建德。增學舍以居其徒。盡復民所占田。其始至也。有田三百畝。比受代而去。有田一千畝。稼軒前賢遺迹。多爲人所據。悉按其籍奪而歸之。江東新界院額。有司奉臺府之命。選辟先生以闡教事。學者翕然知所宗仰。文宗在潛邸。遣近侍子弟來學。賜以金幣牢醴。禮遇甚至。於鉛山則新其廟學。豪家築室。侵入切牆內地。久莫能正。先生白于部使者。命毀其室。乃

懼而請以腴田二十畝易之。鵝湖書院之旁有道觀，先生偶至其處，有驢跑觀前隙地，驅去復來，默卜之曰：「地下果有物，驢當復至。」已而驢果來，跑益力，乃訪觀主求發之，得石碣十餘，刻羣賢像，因爲作羣賢堂。先是平章政事趙涼公及王御史理嘗舉先生可教國子，趙御史承禧舉先生可提舉儒學，俱不報。先生歸後，郡守王侯元恭踵門禮請先生爲學者師，帥閩及旁郡廣行鄉飲酒禮，皆俟先生討論而後定。郡故有宋丞相史越王所置義廩，以助仕族儒家昏喪之不給，自先生爲之督視，貧者始實受其惠。先生素所厚，一二達官魁士相繼凋謝，先生若有所不樂。一日，拏舟游東湖，諸生載酒追及之，飲于中流，酒半酣，指所卜葬地曰：「若豈知我之歸於斯不久也耶？」學問之道，具在聖經賢傳，吾嘗述之矣，真知實踐，則存乎其人，尙懋之哉！諸生爲之黯然，各奉觴爲壽而歸。自是多以病不出，久之病加劇，客有將上京師者，過而言別，相與論宋季事，娓娓不倦。既正冠送客，顏色忽變，痰氣作，醫者以丹劑進，先生卻之曰：「不敢服也。」目已瞑而頭微偏，門人樂良進曰：「先生頭容稍偏矣。」復張目端坐而逝。至正五年夏六月甲子也，享年七十有五。以六年某月某日甲子葬陽堂鄉之陶壘，娶潘氏，潘爲建平望族，先生主教事時，慕其賢而以女歸之，卒因葬于建平。至是奉遷而合附焉。子男一人，衍女四人，孫男一人，循理女三人。蓋宋季之士，率務以記誦辭章爲資身取寵之具，而言道學者亦莫盛於此時。四明之學，祖陸氏而宗楊袁，其言朱子之學者，自黃氏震、史氏蒙卿始。朱子之傳者，晏氏淵、大陽先生出，以至于史氏，而先生承之。黃氏主於躬行，而史氏務明體以達用，先生素有志於當世，惜其仕不大顯，故平生蘊蓄未克究於設施，而私淑諸

人者不爲無功於名教也。故禮部郎中韓公居仁嘗學於小陽先生。其仕於先生之鄉。與先生論議無不脗合。行省屢聘先生較文鄉闈。先生以爲國朝設科。初意專取朱子貢舉私議。今多違之。吾往宜不合。力辭不赴。其源流本末可概見也。先生色莊而氣夷。善誘學者。使之日改月化。而仲氏太史公端學。克謹師法。學者尤嚴憚之。人以此河南程氏兩夫子云。先生所著有進學規程若干卷。國子監以頒于郡縣。學使以爲學法。有畏齋文集若干卷。藏於家。先生葬後二年。門人徐仁等若干人相與謀。俾樂良奉宣文閣授經郎危素之狀來謁銘。潛幸嘗辱交於先生。徵於狀無不合。乃併以平昔所知者論次而銘之。銘曰。大道孔夷。聖賢同趨。政厖俗裂。師異指殊。真儒有作。乃發其蘖。先生之傳。遠有端緒。左規右矩。蹈夫大中。居之以寬。休休有容。道之將行。夫豈弗仕。委蛇進退。時行時止。志局於位。厥施未豐。惟其教思。垂於無窮。門人謁辭。論譚遺德。畀于方來。永有矜式。

金谿曾君墓誌銘

撫之金谿。有篤行之士。曰曾君。諱嚴卿。字務光。以致和元年六月辛丑卒。年五十有三。門人相與私諡曰恭貞先生。至元某年十月某甲子。葬所居陶原里明山之麓。其子堅辱交於某。謂先世在異時。嘗有同年好。以銘來屬。其不得辭。按曾氏世譜。曾子後十四世。當王莽時。避地豫章之廬陵。凡六世。始徙臨川。今撫州也。又十二世至康。刺史司空洪立。乃徙南豐。洪立生散騎常侍延鐸。延鐸生仁昭。仁昭。宋中書舍人鞏。尙書左僕射右翰林學士肇。皆仁旺之後。仁昭生贊堯。贊堯生易祥。易祥生千。復居撫之金谿。千生學。

生應臣。應臣生仕欽。仕欽生濟。濟生綱。綱生彥明。則君之高祖也。曾祖諱激。隱居弗仕。祖諱子良。擢咸淳龍飛進士第。終於淳安令。父諱正言。國子進士。並以文學行義。師表其鄉。母黃氏。澧州司理。參軍。庭蘭之女。生君於淳安。故名嚴而字光。君質厚氣完。不妄言笑。雖晏休。必正襟危坐。事親至孝。父有疾。呼天乞以身代。父命疾旋愈。自祖父以來。皆推先世故業。與其兄弟。君亦以所居室讓其叔。有四妹。悉營嫁之。逮其有子。皆教育使至成人。平居不汲汲於生事。視勢利漠如也。讀書日有常程。務求知聖賢微言大旨。而不徒事記覽。於文主於理。未始與人較其短長。而一時負才氣者。皆自以爲不及。同里以士名者。無不受業焉。君接之色溫而莊。恆以經術教授。誦說若不能出諸口。及有所問難。分章別句。類數辯名。無不究盡。隨才誘掖。以成其美。而不病以其所不能。與人交。無圭角崖岸。不矯矯爲異。亦不翁翁爲同。人自不得而親疎之。鄰里有見侵侮者。未嘗形於言色。咸服其長者。家人化之。雖僮僕不聞有穢惡之聲。史稱黃叔度。言論風旨無所傳聞。而見之者靡不服深遠。去疵吝。君庶幾近之。然君遺文有南明齋藁三十卷。傳於學者。言論風旨之在人固多矣。娶何氏。後十六年卒。合葬焉。子男二人。長堅。鄉貢進士。博學有文。能世其家。次大年。早卒。女二人。適南城歐復。同邑黃里。孫男五人。侁。偕。儕。仰。佺。曾孫男一人。立。銘曰。嗚呼先生。學足以禔身。行足以範俗。無欲而心自正。不言而民自服。前人之光。是迓是續。世其德而不世其祿。天運有常。其周必復。惟爾嗣人。有轟其伏。

至元元貞間。部使者振舉學校。悉延至前代遺老。以主教事。一時英俊之士。咸立下風。惟審言夙負材望。以弱冠之年。與之並登于師席。衆皆羨慕焉。審言顧獨恬於進取。筮仕垂四十年。猶俛首常調。隨牒遠方。後來居上者。不知其幾。及審言以六品官致其事。而竟不得從容享一日之安。嗚呼悲乎。審言姓葉氏。諱謹翁。審言字也。世爲婺之金華人。曾大父大冶縣主簿。邦受業呂成公之門。以所得於成公者。授徐文清公僑。文清後爲朱文公門人高第。而於大冶君執弟子禮。沒身不衰。大父榮發。深自韜晦。罕與物接。父霖始。復以家學私淑其里人。故端明殿學士王公埜。知南康軍。葉公閻。咸敬禮焉。仕皇朝。卒官將仕佐郎。婺州路蘭谿州儒學教授。致仕。母曹氏。有賢行。審言性明達。而蚤有知。於書無不讀。由家傳之端緒。泝儒先之源委。卓然自立。諸老無不樂與之游。舉教官。歷浦江義烏兩縣教諭。升衢之明正書院山長。丁外艱。服除。上名銓部。借授處之縉雲縣。官政鄉巡檢。丁內艱。服除。遷吉安之吉水州學教授。秩滿。調泉之晉江縣主簿。階將仕郎。同僚有與之不合者。力構陷之。部使者雖莫能察。而心竊疑焉。不及竟其事而去。後使者得審言受誣狀。而不欲自爲異同。乃貰其罪。而解其職。頃之仍舊階。改調婺州路司獄。在官五年。以老請謝事。授承務郎。温州路同知。瑞安州事。致仕。命下。審言已以疾不起。審言事親孝。父子自爲師友。念母老。不可一日去左右。所至必侍奉以行。仲弟無依。贍之終身。平居寡欲。治家有法。吉凶慶弔。一遵成公家範。曰。吾有所受之也。貲產素薄。而室廬再厄於災。至無一椽以庇風雨。僑寓說齋精舍。久之。乃得老屋數楹。僻在東郭外。教子之暇。日以種蒔爲事。暮年徙居城西北隅。閒得微祿。不足自給。處之晏如。時從朋舊。飲

酒賦詩。陶然自適。易簣之日。有書數卷。田數畝而已。審言所居齋室。扁曰四勿。自號贅翁。歸自泉南。又自號曲全道人。所爲詩文。和易平實。無纖麗之態。有四勿齋藁若干卷。曲全若干卷。藏於家。審言生於宋咸淳八年四月十六日。卒於今至正六年十月十日。年七十有五。娶蘇氏。文定公口世孫女。後三年卒。以某年某月某日。合葬於金華縣赤松鄉羅家橋之原。子男三人。長敬之。處州路慶元縣榮慶鄉巡檢。前卒。次復之。未仕。次泰之。廩補江浙行中書省廣濟庫。子女七人。其五適同郡嚴弘道。趙嗣滋。杜宏。喻德順。潘繼善。其二以疾在室。孫男一人。女二人。其一適浦江張禮。其一尙幼。審言所交皆四方名士。里居之日。最所友善者。許文懿公謙。翰林待制柳公貫。太常博士胡君助。禮部郎中吳君師道。翰林修撰張君樞。而潛小。幸獲陪諸公之末。至是諸公多已凋謝。惟胡君與某獨存。故泰之求胡君爲之狀。而屬某以銘。嗚呼。悲夫。載念某之少也。從先生長者。詠歌先王之道。於寬閑寂寞之鄉。將以是終其身。審言力挽之出。而游宦不遂。晚通朝籍。以親老請外。遂納祿而歸。審言適已掛冠。往見之雙溪上。握手道舊故。殊款洽。別去甫一月。而審言逝矣。又一月。而某蒙恩錫召。欲伸繡帷之一慟。而不可得。銘固不敢以諉於他人也。嗚呼。悲夫。審言分教兩縣。所至以教養爲務。興壞起廢之功尤多。其在明正書院。復道流冒占之田二百餘畝。吉水號多士。教官良不易爲。審言處之有道。由是士論厭服。審言爲巡官。則能使盜息而民安。爲獄官。則能使囚徒不失其所。誠可謂得其職。而審言之所以不朽者不專在是也。茲不詳述焉。銘曰。

有作而興。載揚其英。胡不奮飛。徐徐吾行。黽勉從事。靡愛其力。執虛若盈。戰兢夕惕。不疑於人。蹈夫危機。

困而能亨。罔間險夷。皇仁在上。天日臨照。朱紱之來。于光有耀。鼓缶而歌。式全吾歸。孰昭其昧。曰有刻辭。

上海縣主簿吳君墓誌銘

君諱福孫。字子善。姓吳氏。其先有爲宋執政者。曰正肅公育。自建之浦城。徙汴之新鄭。南渡初。有自汴之新鄭徙武義者。曰克立。逮君。口世矣。父東。又自婺徙家于杭。故今爲杭州人。母施氏。君生而俊爽。稍長。強學好修。元貞元年。君猶未冠。用浙西憲使東平徐公察舉。補嘉興路儒學錄。遷寧國路儒學正。江東憲司治寧國涿郡盧公。按臨之暇。略其勢分。而與之游。數以詩篇相倡答。君旣書再考。例當序進。絕口不自言。前代名流及時之雅望。若戴先生率初。仇先生仁近。胡先生汲仲。鄧先生善之。咸加愛重。莫不折行輩與之均禮。魏國趙文敏公。待之尤親密。文敏以善書名天下。慕而效之者。往往逼真。然罕有若君能得其早年楷法之妙者。君兼工於篆籀。文敏極稱許之。皇慶二年。詔起文敏入侍講於集賢。挽君俱行。中朝賢士大夫。禮遇甚至。君泊然未嘗有所造請。至治二年。乃以教官借授湖州路潮陽縣青洋山巡檢。遐荒之地。縣長貳久闕。君攝縣事。獲強盜之逋誅者八人。脫平民被誣於盜者若干人。而獲其真盜者若干人。廣東憲府有疑獄。多以委焉。未幾。移疾而歸。至順二年。赴選。集於京師。某月某日。天子坐奎章閣。阿榮大學士。以其所作小楷書數萬字上進。因得召見。嚶嚶學士方侍書於閣中。前奏曰。臣濫得能書名。如吳福孫所書。雖臣亦有所不及。上頷之。命侍臣引金鍾酌酒以賜。將用爲閣職。有沮之者而止。今上皇帝至元元年。調常州路儒學教授。君氣岸素高。又在師儒之位。不肯爲諂曲以事上官。竟坐是去。改調嘉興路澈浦務。

稅課大使。君承命欣然就職。殊不以爲歎也。晚益務恬退。足迹不涉達官貴人之門。日與方外大老玄覽王真人及名公之歸休弗仕者。湖南帥于公有卿。道州守徐公叔清。翰林次對劉公時中。徜徉湖山間。不復以仕祿爲意。至正六年。銓曹考其資歷。當升授將仕佐郎。松江府上海縣主簿。到官之始。歲適大旱。有禱立應。遂爲豐年。理民田爲豪強所據久而不歸者。諭止婚媾之訟。積數歲不決者。他利害有當興除。方次第舉行。俄奉省檄。詣溫台兩郡。臨給鹽場工本。七年秋。執事於鄉闈。甫畢。復俾馳傳督閩中稅賦。以疾還上海。八年正月十三日。卒於所居之廡舍。享年六十有九。以某年某月某日。返葬錢塘縣欽賢鄉西溪花塢先墓之西。娶唐氏。宋朝請大夫天麟之孫女。前五年卒。合葬焉。子男一人。肅。女一人。適宜興岳枋。早卒。孫男繼善。君明敏出於天性。豪逸不羈。談辯絕人。娓娓不倦。好客之名。聞於四方。自儒釋老氏。至於岐黃。汜勝之書。無不讀。嗜古彝器法書名畫。其書篆施於金石爲尤宜。奉贄幣求之者無虛日。禮部尙書秦不花。嘗爲扁其所居。曰清容軒。因自號清容野叟。所著有清容軒手鈔若干卷。樂善齋集若干卷。古文韻選若干卷。古印史一卷。藏於家。君入仕時。年甫十有六。至四十有三。始被初命。及出佐一縣。已六十有七矣。問一歲遂不起。士患不遇。君可謂有所遇否乎。後來者居上。而君僅止於斯。天乎。人乎。肅以狀來謁。銘。謹撫其所述。附以平昔所知者。序而銘之。銘曰。

先發而後至。進難而退易。不及汲於富貴。類依隱以玩世。鬱鬱而不衰者。浩然之氣。俯無忤兮仰無愧。不羸於躬兮來者之界。

武略將軍海道漕運副萬戶曹公墓誌銘

曹氏之先。出於宋名將冀國武惠王彬。南渡時。由汴徙吳。今居平江常熟州之祿莊里者。號福山曹氏。最爲望宗。聚族二百餘人。仕國朝多顯者。而公之曾大父昌。大父通。俱晦迹弗耀。父文富。始以公故。贈武德將軍。平江等處海運千戶驍騎尉。追封長洲縣子。母王氏。追封長洲縣君。公諱某。天資剛直。動必由禮。事親善色養。以孝謹稱。服用尙儉素。戒子孫以爲法。治家井井有條。積而能散。私帑不蓄。羨財。聞人有善。喜形於色。不啻出於己。里中俊秀貧不能就學者。必周給之。不喜暴人之惡。有小過。必委曲化導。使知自悔。鄉人有不能制其僂子者。公呼之來前。諭以人心天理。其子感悟。卒爲善人。公每謂人生於世。但當設心坦夷。仰不愧俯不怍足矣。奚必泥古人之陳迹。事事求合乎識者以爲名言。年踰弱冠。猶未有宦遊之意。會朝廷創開海道以通漕運。首以材選而服其事。大德四年。制授金符敦武校尉海道運糧千戶。秩滿授元降金符。遷嘉定等處海運副千戶。公律己以廉。處事有法。所部之人咸畏而愛之。嘗開洋而遇風濤大作。舟人震駭。公神色自若。徐諭之曰。委質爲臣。當忘身而徇國。進思盡忠。天必佑之。衆莫不服其量。大府或以事咨詢於衆。多俟公言而後定。至大三年。超授金符武略將軍海道漕運都萬戶府副萬戶。公數以漕事往來南北。而深察其利害。視事伊始。凡所興除。公私咸以爲便。四年夏。部海艘八百所。漕米以石計者百七十四萬八千六百四十有九。畫旗宵柝。號令肅然。舳艫相銜。首尾不絕。旬日之間。已達海口。舊傳海道有神司之人。恃以無恐。公獨潔致禱。感應如響。有相之道焉。玉音獎諭。宴勞錫予。視常歲有加。人以

爲榮。而公雅志恬退。既受代。卽屏居邱園。優游自適。幾若與世相忘。同列有惜其去者。言於當路。乞挽留之。至治二年。有旨起公爲平江等處海運香糯所千戶。三年夏。督運至京師。賞賚尤渥。廷議復用公爲萬戶。未命而公遽以疾卒。泰定元年四月某日也。享年六十。以其年某月某日。葬於福山塘之西。卽公垂屬。續命割上腴之田一百九十有八畝。築精舍。擇方外之人主之。俾以歲入。供晨香夕燈。汛掃百須之費。顧語諸子曰。吾不以身後事累汝也。夫人蘇氏。封長洲縣君。以禮自持。克配君子。嘗發私笈。造輿梁。以濟行者。成公之志也。子男八人。長文華。將仕佐郎。平江路崑山州稅課大使。贈奉訓大夫。徽州路婺源州知州。飛騎尉。追封吳縣男。次思聰。將仕佐郎。兩浙都轉運鹽使司永嘉場鹽司丞。次思溫。徵事郎。温州路稅課提領。次思恭。不仕。次思賢。將仕佐郎。平江路長洲縣尉。次思忠。次文英。次思問。皆未仕。女四人。孫男二十人。文華長子珪。襲公職。佩金符爲忠翊校尉。平江等處海運香糯所副千戶。次堃。仙。由也里哈溫必闌赤。累遷從仕郎。宣政院崇教所知事。餘皆未仕。曾孫男三十人。初武德府君早世。王夫人躬靡他之誓。教育其三子。訖有成立。長卽公。次良玉。承務郎。冀寧等處稻田司提舉。無子。公命以思賢爲之後。次濟滿。從仕郎。常州路宜興州判官。贈集賢修撰承直郎。公沒二十有六年。而珪來京師。以銘爲請。蓋公先三世。皆厚施而不食其報。故公遭逢聖代。克承天寵。久鬱必發。乃理之常。雖所用未究。而諸子嗣有名位。適孫遂世其官。餘慶所及。未見其止。推本積累之自。而昭示于後人。所以使之引而勿替也。銘其可無作乎。銘曰。海於兩間。爲物最鉅。孰能以力。與爲勝負。有偉曹公。孔敏具武。出長萬夫。訓齊行伍。風檣浪楫。若鷗斯舉。

精忱所格。百靈呵扈。天吳罔象。莫敢予侮。千艘並集。灌輸天府。克有成績。徹聞當宁。傳宣宴勞。秩秩樽俎。筐篚之將。便蕃錫予。公不自矜。翮其遠翥。鋒車召還。不留不處。爲官擇人。委以印組。上方用公。還領故部。公忽已仙。返於帝所。有子成考。咸躋官簿。惟時聞孫。大纂遺緒。從事賢勞。無忝爾祖。如漢世官。氏以倉庾。福山之西。匪堂伊斧。史官勒銘。垂輝千古。

華亭黃君墓誌銘

始予校文鄉闈。華亭黃璋。首以薦書北上。試有司不合而歸。益肆其力於學。無少懈。及予起自退休。入直詞林。被旨預聞試事。璋以再薦而來。竟不偶。予能得之於二十年之先。而不能不失之於二十年之後。方用自媿。而璋殊不以欣感累其意。踏予門再拜而言曰。吾家上世。未有以官業知名於時者。璋卽歲就學。吾大父暨吾父。延名師開導而飭厲之。甚至庶幾躋攀分寸爲閭里之榮。而吾大父已不及待。大父歿且葬十年。而吾父未有以表於邱隧。蓋有望於璋。而璋又鄙劣不克自振。無以復於吾父。失今弗圖。懼久遂廢缺。辱賜之一言。俾吾大父歿而不亡。吾父亦有以自慰。璋雖爲明時棄物。無憾也。予竊矜其志。而嘉其言之有禮。乃序而銘之。序曰。君姓黃氏。諱允恭。字敬翁。松江之華亭縣人。自曾祖昌。祖原長。父文榮。逮君皆弗仕。君爲人謹厚而嚴恪。服食不事侈美。江南新附之初。愚民未洽於教化。多相率爲盜。君年二十餘。痛其家焚掠無遺。夙夜苦心勞形。期復先業。絲蓄粒聚。家以苟完。久益充裕。或有急而求假貸。必如其請。貧不能償。則折其券。與人交。篤於信義。或以非理相加。忍弗與校也。性至孝。母吳氏。年垂百。君之年亦踰

七十溫清定省。未嘗輒廢。遭喪致毀。不嫌其過乎哀。歲時子孫捧觴爲壽。必諭以勤儉保家爲務。元統元年。有詔旌高年耆德之士。府以名上於行中書省。命縣長吏詣其家。表署如式。御史安公爲大書其里門。曰旌德云。君結廬先隴之側。優游息偃。旣壽而康。出入動件。無異少壯時。偶感微疾。而遽弗起。屬纊神識不亂。大斂面如生。其善自持養可知也。君生於宋寶祐元年十一月十八日。卒於今至元五年二月十八日。享年八十有七。以其年三月某日。葬於胥滿鄉柳環里父墓西若干步。娶許氏。子男一人曰鉞。璋之父也。女一人。適許庭芝。孫男三人。琛本君庶子。命爲鉞之子。珪無錫州新安巡檢。璋以天歷二年至正四年。兩取鄉薦。今用特恩當補官未調。女一人。曾孫男三人。女七人。元孫男二人。女一人。予聞之。歐陽子曰。爲善無不報。而遲速有時。君積累之素。傳於再世。以其時考之。不爲不久矣。爲善之報。果何如哉。姑爲之銘。使刻以俟。銘曰。

繫君之先。未有顯聞。積善自躬。傳子及孫。旣藹旣播。而又肯穫。不以無年。輟而弗學。其種其穫。物之不齊。日至而熟。食之有時。惟銘可徵。刻此貞石。告于後人。用勸無斁。

南稜先生墓誌銘

先生姓王氏。諱炎澤。字威仲。學者因其別號。尊之曰南稜先生。其先系出太原。五季時。自會稽徙婺之義烏者。彥超。官至節度使。其諸孫固。早遊安定胡公之門。登皇祐五年進士第。宋三百年。縣人取科第自固始。卒官恩陽令。右正言。知制誥。李公清臣銘其墓。固諸孫從用生說。贈宣奉大夫工部尙書郭公三益。表

其墓。說生永年。喬年。永年登紹聖元年進士第。嘗仕于京師。而僑居于濟南。後復歸義烏而占籍焉。終於中大夫知福州文安縣開國男贈正議大夫子鑄。通判嘉興府贈金紫光祿大夫。儔從政郎嚴州司法參軍。娶陳忠肅公子直祕閣正彙之女。其沒也。正彙誌其墓。鑄子寧。提舉廣東常平茶鹽贈中散大夫。寅。歷知宜連藤柳峽饒江七州積階朝請大夫。喬年子濤。承奉郎。濤子寓。江東轉運司幹辦公事。其世序官閥。見於譜牒如此。餘以賞延入官十有五人。其通朝籍部郡符者。不可悉舉。運幹則先生之高祖也。曾祖諱誠。祖諱衛道。並潛晦弗耀。考諱濟。以景定二年。應薦爲國子免解進士。妣葉氏。軍器監丞夔路轉運判官藁之孫女。通齋隱君由庚之女。先生少嗜書。稍長治舉子業。穎出儕輩間。運去物改。而場屋事廢。因得專意探索聖賢之微旨。家庭所受。既得其素。而通齋爲外大父。又從徐文清公傳考亭朱子之學。風聲氣習之所存。感發尤多。而操行愈堅。窮居約處。開門授徒。絕口不言仕進。久之乃用部使者察舉。起爲東陽常山兩縣教諭。遷石峽書院山長。所至以善教養得士譽。在石峽歲餘。卽棄官而歸。徜徉於家林。逾十寒暑。至順三年八月十二日。以未疾卒。享年八十。其年十月十日。葬縣南崇德鄉湖陽山先墓之次。先生氣貌充偉。而襟度疎暢。待人一本於誠。言論磊落。無所隱蔽。莫不敬服焉。爲諸生講說。務推明其大義。不事支離穿鑿。文簡質而主於理。詩極渾厚。而間出奇語。不屑以雕刻求工也。有南稜類藁二十卷。初考君無子。嘗鞠其族子而弗克家。復選族人得先生以爲子。俾盡有其田廬。先生辭曰。凡爲人繼嗣。貴能紹其先業耳。田廬固非所計。而田廬之不均。先業未有不因以墮者也。考君賢其言。卒成其志。而均給焉。族黨以是

多之。娶傅氏。前三十年卒。先生之葬。實同兆域。子男二人。長良玉。常山縣儒學教諭。次良珉。女三人。適傅保、許文俊、傅復亨。孫男四人。裕、禕、補、初。曾孫男三人。良玉葬先生。殆將兩紀。乃來諗於潛曰。先人家居教授。前後及門數十百人。而無顯者。不朽之託。非子其誰。願以子方效官於中外。未遑有請。子既得謝而退。失今弗圖。懼流風遺範。日就湮沒。謹命次男禕。疏其行實。以俟采摭而論撰焉。潛竊惟吾里衣冠望宗。莫有先於王氏。文獻之相仍。亦莫久於王氏。先生引而弗替。畀付有人。見其進未見其止。豈必亮就高位而後爲能世其家也哉。潛自總角。忝預弟子列。今也髮種種矣。嗟逝者之如斯。愧前聞之荒落。言不能文。而義不敢辭。銘曰。

婺女之墟。孝子之里。以儒起家。肇自王氏。世科世祿。恆不乏人。重珪疊組。萃於一門。是似是續。蟬聯十葉。復抱遺經。修其世業。先生承之。弗墜益振。如木有本。如水有源。教施於鄉。佩衿濟濟。道之將行。乃止不仕。尙克有子。而又有孫。餘潤所蒙。有林彬彬。趾美於前。垂休於後。嗚呼先生。是謂不朽。

贈承事郎同知奉化州事葉府君墓誌銘

君諱應咸。字心可。姓葉氏。處州麗水縣人。葉於處爲著族。君十世祖襄。自松陽徙麗水。遂占籍焉。高祖冠。宋季再領鄉薦。善言性理。而尤深於易。有起進士至敷文閣待制者曰宋。其伯兄也。曾祖一鳴。舉進士。未第而卒。祖正大。登仕郎。父天與。仕皇朝爲美化書院山長。秩滿當教授一州。輒棄不就。母青田潘氏。宋祕書丞復之曾孫女。君少有經濟志。嘗慨然曰。窮經將以致用也。非精無以造微。非篤無以道遠。乃發先世

遺書朝誦暮習。凡聖賢授受之奧。古今治忽之幾。至於儀章度數。圖書歷象。靡不研究。山長公知其將適於用。試使綜理家務。外內修飭。日有餘暇。山長公正衣冠坐堂上。子孫環列左右。俾君援引經傳典故。參以當今事宜。而訓戒之。雖隆寒盛暑不廢。前史官鄭陶孫以子壻銘登仕公之墓。稱君通朗。秀潤詳雅。善幹蠱。人以爲無媿辭。科舉初行。有司以君充賦。試不合。以親老不復入場屋。專意色養。甘旨之奉。必夫婦親之。或燕飲他所。遇時新之物。未薦於祖。未進於親者。則不敢嘗。子守以爲法。天歷戊辰。山長公卒。既祥禫。益不出。築室萊山之西。扁曰肖堂。蓋山長公自號則堂。君示不忘也。母氏生君而卒。君始生之日。則母之諱辰。每至其日。必變服號慟如初喪。子孫無敢言稱壽者。始君既失所恃。登仕公之侍人方氏鞠育之。及長事之如母。奉繼母王氏。曲盡孝敬。撫弟有恩。教子有法。第三子琛。爲通政院宣使。至順辛未。以公事自上京。至江浙行省。便道省侍。君曰。父子天性也。五年一見面。豈不願爲旬日之留。然簡書有程。小子初仕。不可不戒。抵家之日。卽命遍謁先墓。信宿遂行。且告之曰。能愈加廉謹。以自持。則可再見我如今日矣。琛去又五年。未及再見。而君以至元乙亥四月庚申卒於家。得年五十有二。臨終。以山長公墓石未刻。屬諸子緒成之。語不及其他。又明年丁丑十二月壬辰。葬於某鄉岑原之清風臺。去家五里而近。娶同邑湯氏。口都縣尹垓之女。有婦德。生與君同歲。後君六年卒。合葬焉。子男四人。長珂。蚤卒。次玘。後君五年卒。次卽琛。歛縣丞。辟行中書省掾史。考滿而遭君之喪。服除。乃得調。今爲承事郎。處州路青田縣尹。次瑾。未仕。女二人。壻曰湯奎。何達。孫男六人。女三人。曾孫男三人。君所爲詩文。有棲閑集一卷。其言務去健羨。而

甘澹泊。不事華藻。以諧世好也。琛官正七品。法當封贈父母如其秩。至正九年春。得請贈君爲承事郎慶元路同知奉化州事。君配湯氏爲宜人。其明年。琛用治最。受知憲府。委以覈田於吾婺之屬邑。會予歸自京師。乃奉君妹壻松江府儒學教授練晦孫之狀來謁銘。狀稱君材可用世。特以切於孝養不仕。故所施僅及其家。傳曰。是亦爲政。奚其爲政。君蓋有得其旨矣。惟夫知君之深。是以言必以實。而不苟過爲夸大。可謂善敘事者也。予何能贊一辭。庸備著其語。而作銘以系之。銘曰。

士爲善兮。不與名期。積久必發兮。名斯我隨。君則有材兮。又有其時。曷賈弗售兮。卒以不施。安常處順兮。乘化而歸。儲祉實多兮。嗣人之貽。寵靈所加兮。長世光輝。樹此碑板兮。昭以刻辭。

戚君墓誌銘

予爲仲咸銘其父墓後若干年。而仲咸亦卒。其子堯復奉眷友朱濂之狀。以銘爲請。予衰年多感。不忍銘人父子。而堯固請不已。敢不諾。君姓戚氏。諱崇僧。仲咸其字也。上世占籍婺之金華。爲宋官族。高祖諱如琥。朝奉郎。知袁州軍州事。曾祖諱宋祥。從政郎。廣德軍司戶參軍。祖諱紹。入國朝。隱居不仕。私諡貞孝先生。父諱象祖。信州路道一書院山長。母朱氏。前鄉貢進士環之女。君兄弟二人。兄某以材見推擇。從事於憲府。用例補官。君獨不以榮進爲念。端居苦學。間弄翰於詩文。皆精麗綿密。可喜。年二十有七。始盡棄其學。而從鄉先生許公講道於東陽之八華山。用意堅確。蚤夜弗懈。博通經史。旁及諸子百家。尤潛心於儒先性理之說。採幽發微。必極其根柢而已。後同門推爲高第。初袁州府君與從兄如圭如玉。並受業東萊。

呂氏之門。而許公之所承傳。本於考亭朱子。君以得於許公者。歸而稽諸家庭之所聞。無不脗合。自信愈篤。克己厲行。爲人所難能。衣菴食淡。待親朋一以清約。不曲徇時尙。而改其度。每謂人知富貴之可欲。而不知貧賤之可樂也。先廬適毀于菑。君備殫勞動。以復其舊。山長府君漫仕而非其志。厲居闔閭間。偶訪壻呂公汲於永康太平山中。僑寓久之。因君往省。遂卜居焉。君性恬靜。默坐一室。環以書數百卷。非有故不妄出。呂公旣遣諸孫來學於君。復創義塾。聚族人之子弟。使就學。委君主其教事。君克謹師法。持規嚴。學者敬憚之。扁其室曰朝陽。以表鄉士之懷。人稱之朝陽先生云。君有春秋學講一卷。蓋其少作。晚歲所著。有春秋纂例原指三卷。四書儀對二卷。後復古編一卷。昭穆圖一卷。歷代指掌圖二卷。以六書之學。世儒率置而不講。所傳經籍之文。多致譌舛。乃考許氏說文。參以近代諸名公之所訂定。用古篆繕寫易書詩儀禮春秋孝經論語大學中庸孟子。將獻於有司。而乞頒行於四方。以儀禮一經未旣。弗及上。又嘗爲書言時政。欲詣闕陳之。亦弗果行。人見君高蹈物表。目以爲畸人靜者。而不知其未始忘情斯世。第不屑苟售耳。至正十三年十一月十三日。君以疾卒於太平。其年十二月十一日。葬於義烏雙林鄉下頓後祝之原。娶朱氏。從事郎揚州路崇明州判官復淳之女。母氏之姪也。有婦德。諸子惟英非己出。撫而教之。均壹無間。前三十年卒。君之葬與之同兆域。子男五人。長卽英。次蒙。次莊。次莞。次多。早卒。女一人。適金華貞逢慶。亦已卒。孫男一人。訢。遷尙幼。莞懼君之遺志逸行。無以表襮於世。故求託於銘。以傳。予竊以爲古之歿而不亡者。在乎承之得其人。不係乎銘之有無也。君多男子。能讀父書。他日必有出而顯其親者。姑爲

之銘。俾刻石以識焉。銘曰。

戚之家學宗呂氏。百年遺響君克嗣。私淑諸人祖朱子。邇其承傳歸一揆。君先羣從皆進士。季由師氏爲刺史。流芳五葉未渠已。孰無望君復其始。時之可行君則止。世其學弗世其仕。杜門著書逾兩紀。書成未出君不起。俾以銘章示原委。後人毋忘趾其美。

樓文翁墓誌銘

君諱如浚。字文翁。姓樓氏。樓之得姓出於東樓公。子孫散處四方。皆爲官族。在婺之竹山里者。吳有侍中元。散騎常侍峻。宣威將軍陟。齊有給事中幼瑜。梁有侍郎偃。名見史傳圖志。竹山後更號智者里。降及近代。亦有掇儒科通朝籍者。君之曾大父諱幹。大父諱紹祖。父諱某。雖不世其官業。所居猶故里也。母陳氏。君本黃山童氏子。出嗣樓氏。江南新附之初。人心未寧。愚眊因而搆亂。本生父死焉。君方髻鬣。能以智自全。鄰人適見而負之以歸。衆皆駭歎。以遠大期之。甫踰弱冠。復罹家難。母子相依。以續前人之遺緒。君識見多出人意表。族人或忌之。君伯父謂曰。是兒骨相不凡。他日將亢吾宗。宜善遇之。君自少讀書。不習爲記誦詞章。以希世取名。而能知其大意。故其事親孝。奉先有禮。且善治生。有餘力則推而及於族姻鄉鄰。作義塾以教其子弟。窮乏則周之。舅氏嘗託其孤於君。始終經紀其家事。纖悉備至。大德丁未。歲大饑。道殣相望。賴君以活者甚衆。間出粟貸之。踰年而來歸所貸。皆不取息。貧不能償亦不問。公上之徵斂。必先期而集。尤謹於將迎。縣大夫有所詢。則別白是非以告。而無隱。有陰受其賜而不知者。人有患難。赴之恐

後而無德色。居常以氣概自高。而性本自寬厚。有雅量。人莫不樂與之交。四方賓客之來。留連款洽。無虛日。母年九十而終。治喪寧過乎厚。會葬遠近畢至。姦胥大俠。閭里惡子。譁訐成風。人多以小不忍。務力勝之。君悉不與較。順受之而已。久而各自悔服。無敢復相侵侮。故同邑皆相塚者。惟君家久而獨完。君素有幹局。精力過人。兼通當世之務。而安於素分。無慕乎其外。人勸以仕。皆不聽。至正壬辰。朝用兵。誅反者。出粟二千餘石。遺其子輸于官。以佐軍餉。有司刻上其子名。轉達於中書。乞授以官。君聞之。殊無喜色。蓋非其始望也。中歲頗好老氏清淨虛無之說。更創道院。延羽流。與居與游。君一生少疾疢。年既耄。而耳益聰。目益明。飲啖步履。不異少壯時。蒼髯如戟。氣貌充然。其所養可知矣。將終。命悉焚積之逋券。細書累紙。區畫後事。雖細不遺。氣息奄奄。猶據榻危坐。左右懼其疲憊。扶之就枕。乃瞑。君生於宋咸淳庚午正月二十七日。卒於今至正甲午五月十二日。享年八十有五。娶王氏。先二十三年卒。次葉氏。子男六人。長國華。保義副尉。湖州路德清縣主簿。次士祥。次璋。管領拔都民戶總管。府王龍千戶管民司長官。皆王氏出。次士庸。衢州路開化縣儒學教諭。次士毅。次爲許氏姊後。更名煥。女二人。孫十五人。鉉、鏐、鋼、鈞、鈞、銳、鉞、鑄、鉦、鎮、銓、鑄、鐘、鏗。女七人。曾孫男一人。淮。女一人。國華等卜以君卒之年十月十八日。奉柩葬于所居西五里東塘山。與先室王氏合。前期以傅生藻之狀。問銘於予。今年春。傅生來自君所。徵予同游金華之法華山。升高望遠。裴徊久之。明日還過君家。止予宿。張燈醞酒。促席道舊故。追計之。不至。君家已二十有六年。又明日。君欲復與游嵩頭陀智者國師道場。上清五雲龍壽諸山。予以興盡。留詩爲別而歸。孰知遂成永訣。

乎。予少君七歲而蚤衰。行將與草木俱腐。何足以任不朽之託乎。雖然。詎可忽然忘言乎。輒因狀撮其大要爲銘以畀之。聊以抒予哀云爾。銘曰。

嗚呼文翁。素分之安。雅量之寬。處世能順。保家能完。養生能壽。教子能官。人一能之。斯以爲難。翁之於是。殆幾乎全。其可以無傳耶。

許君墓誌銘

君諱熊。字吉甫。姓許氏。婺之東陽人。晉孝子孜之裔。爲近代衣冠鉅族。居邑之南者曰南許。居邑之西者曰西許。而君之先居昭仁里之梅峴。則由西許而支分也。宋宣和中。陸寇猖獗。八世祖瓊。集丁壯捍州城。有功。補秉義郎。以城中食盡。援絕。力戰而死。鄉人爲立廟而祭之。曾大父諱崇之。大父諱元凱。父諱文奎。值宋社之阽危。羣盜充斥。挈家僑寓州治西南之桐齊坊。而君生焉。其復歸也。君生六年矣。卽使就學。朝益暮習。孳孳不懈。父性方嚴。君左右敬承。克盡子職。特鍾愛焉。長兄熹。爲伯父後。雖異居。而有無相通。不以彼此爲間。仲兄勳。與君同業。凡理家務。應官府之需。皆君獨任其勞。而遺之以逸。仲兄僮。儻好客。終日趨待。無厭倦之容。仲兄歿。止一子。甫十歲。教育之。至於成人。而授之室。君於族黨。以歲時會拜。正尊卑之分。以祭祀飲福。序親愛之情。貧窶則加周卹。推而及於鄉鄰。凶歲賴以獲全者甚衆。遇急難。必扶持拯救之。事之以義起者。輒欣然爲之倡。每誦昔人寧人負我。無我負人之語。故與物無忤。樂道人之善。而不欲指撻其過。人以是稱之。君鬚眉秀爽。氣貌端重。平生安於素分。而無慕乎外。自號樵隱。以見其志焉。君

生於至元戊子二月十一日。卒於至正辛卯六月十一日。享年六十有四。以其年十二月十五日。葬家南五里之西許山。遵治命也。娶義烏徐氏。寶謨閣待制文清公之曾孫。通判官州鑄之孫。江東總領所幹官通之女。子男五人。忻、恂、悌、恆、權。孫男七人。震、亨、蒙、亨、大有、巽、亨、大同、益、亨、鼎、亨。女六人。長適同邑陳應昌。餘在室。君孝友。出於天性。父無恙時。愛西山之勝。有終焉之意。欲購其地不可得。及既歿。而葬於柏墩。其人始以地來售。乃營兆域。改葬而治冢舍於其旁。以酬先志。按儒先遺法。創祠堂於所居之左。而饋薦以禮。八世祖廟。久壞弗葺。發已囊徹而新之。仍畀以祭田若干畝。俾族人之無所歸者。掌其祠事。月有廩給焉。又以外氏徐文清公之本支彫落。將爲之立後建祠。有志而弗遂也。君葬後三年。忻等以婺州路儒學正王君龍友之狀來謁銘。王許故有連。君之父與王君之伯氏御史公同師事鄉貢進士石先生。而王君又與君二兄繼登先生之門。故知君爲最詳。狀所述其目有八。文繁不可具載。謹撮其大要以爲序而銘之。銘曰。

嗚呼許君。學足以持其身。行足以律其家。接物常存於寬厚。處世不奪於紛華。豈非所謂一鄉之善士者耶。

退藏山人趙君墓誌銘

君諱若磐。字仲和。姓趙氏。其先於宋有屬籍。君所祖曰德雍。天平軍節度觀察留後咸寧郡公。贈宣德軍節度使。同中書門下平章事。兼侍中。追封廣陵郡王。諡康簡。實魏悼王第四子。廣陵生承亮。感德軍節度

使秦國公贈樂平郡王諡恭靖樂平生克愉封魏國公諡文思文思生叔蒞內殿承制承制生堅之南渡初自開封徙衢州終於口口大夫累贈正奉大夫正奉之子承事郎平江府常熟縣丞公傅則君之高祖也娶婺州蘭谿徐氏又自衢徙蘭谿之甘棠鄉新豐里曾祖諱彥洪迪功郎福州長谿縣丞祖諱盱夫從政郎處州遂昌縣令父諱時堯本成忠郎覆夫所生於常熟爲曾孫故遂昌育以爲子母徐氏主管尙書禮兵部架閣文字介之孫女君幼開敏授以書輒能通大義年十有二而宗國顛覆又二年而失所怙時新附未久君朝夕奔走以聽科繇恆惴惴焉恐不克保其家嫺黨莫爲之援反侵虐之母子相顧憂蹙弗堪君不得已俛首刀筆間斬以禦外侮遂僑居於郡城旣而見推擇爲主獄吏數辯繫者之冤所活數十人部使者以爲能陞本郡列曹掾用例遷衢州府公之賢者咸加禮遇而權貪以不附己深銜之君強直自信無所回撓竟不見容而免君太息曰始吾以門戶多艱姑寓迹於是家幸稍寧不貽親憂可以止矣乃歸理舊業因以退藏自號君家居孝於母友於諸弟尤篤於教子待姻黨有恩未嘗以疇昔之故爲芥蒂人有善必亟稱之至赴人之急難雖莫夜風雨無所憚母年七十四而終遷父柩合葬東陽縣懷德鄉之勝湖山且以其自號者扁諸墓廬云君疾旣革命內外靜默無譁惟戒其子嗣鴻以謹祭享保邱墓言終而卒重紀至元之二年九月三日也享年七十有二娶陳氏何氏李氏何氏太府寺主簿某之女前君三十年卒陳氏有子嗣淇與俱後君五月卒子男三人長卽嗣淇次嗣鴻嗣滋皆何氏所出也女二人適金華楊森翁義烏陳善新孫男八人古忠古憲古愚古怡古性古懌古悅古悅女六人其四已行二尙幼

君歿後十年。是爲至正某年。嗣鴻乃克治地於金華縣婺女鄉芙蓉山之原。卜以其年某月某日。奉柩以葬。爰狀君行。踏予門再拜而言曰。始先人遣嗣鴻受業於鄉先生許君。語嗣鴻曰。吾衰朽無成。汝兄既早失學。汝弟又以疾廢。三百年詩禮之傳。天其或者不汝絕乎。汝其勉之。嗣鴻無能奉承教命。大懼世敍之可徵者。子孫日遠日忘。而先人之承其先開其後者。無以昭示於永久。願備敍而銘諸。予旣答拜。遂按狀所述爲之序。而系以銘。俾歸刻焉。銘曰。

行其權。曲以全。執其節。剛以折。晦而明。心則亨。歿不朽。惟有後。

承務郎松江府判官致仕王公墓誌銘

公諱肖翁。字傅朋。姓王氏。世爲婺之金華人。宋太師左丞相魯國文定公諱淮之元孫。中大夫太府卿贈少師東陽郡開國公諱棟之曾孫。中奉大夫直較文閣福建路轉運計度副使金華縣開國男諱似之孫。朝奉郎將作監主簿諱琦之子也。公生而岐嶷。長益闡敏。才學兼茂。爲宗邦所欽仰。又其姿表明秀。風稟蘊藉。雖當乎運去物改之餘。望而知其爲相門子弟矣。起家衢婺二郡儒學錄。大德中。陞婺郡儒學正。考滿。當得教授一郡。而國制教授。必年艾以上。始得爲之。公名上天官。蓋未四十也。是時奎章閣侍書學士蜀郡虞公集。與公生同歲。亦以儒學正考滿同在選中。而年皆不及格。有司以常制持之。廷臣言虞集雍忠肅公孫。王肖翁魯文定公孫。皆前代名宰相家子。且學藝不羣。不得拘於常制。於是虞文得教授京畿。而公爲靜江教授。南方歛暑多瘴。公到官。居亡何。卽移病而歸。家食十年。延祐末。復起教授南康。會白鹿

洞書院山長缺。郡守崔公翼之請公攝山長事。書院久廢。公爲復興之。新其屋宇。廣其田租。而來學者滋衆。士譽翕然。至治初。辟江西行中書省掾史。贛人有因覈田虛增糧額萬餘石而生變者。事數年不決。公以謂民變雖靖。而糧之虛額宜在所必除。儒學官待選者以千數。先是持選衡者。皆顧憚不敢理。日致蹇滯。公閱選簿。爲之銓注。數日而畢。由是宰臣器重之。惟其言是用。休聞以彰。泰定四年。積年勞除將仕郎。海道都漕運萬戶府知事。海道歲漕東南百萬之粟。供億京師。以軍興法從事。其任至重。自漕師至僚吏。率以選居。公居幕中三年。上下克協。漕事訖辦。僉以爲能。仍紀至元二年。轉從仕郎。嘉興錄事。適歲祲。部使者檄公行視田。公爲其實以聞。得免荒租數萬石。他州郡有奸利事。部使者悉以委公決。公決之無或不當者。惠利及人甚衆。政績益著。未幾屬疾。請致其事。遂以承務郎松江府判官致仕。命未下而公卒。其年十月癸巳也。享年六十有五。以五年二月壬寅。葬於金華縣婺女鄉施家塘之原。公娶唐氏。子男六人。長萱。泉州德化縣主簿。次藻。林州路海寧州判官。次蘭。鎮江錄事司判官。次荃。次葵。次葍。奉化州儒學正。女三人。長適劉文同。次適申夔。次適吳儼。孫男十二人。女八人。公天性孝友。事親無違禮。養寡姊弱甥。無失所者。教諸子必由於禮法。家庭之內。肅然有儀。所得祿秩。多以周親黨。振貧乏。內顧不足。不以爲累。高懷雅興。一寓於詩。而尤善筆札。論者謂其酷似吳傅朋。短章醉墨。人爭寶愛之。初魯公在淳熙間。久居相位。是時南北講解。中外無事。一用柔道佐時。絀尙利喜功之說。以休養其民人。以故百年之間。江左元元。得以養生送死而無憾。南渡以還。論相業者。莫於斯爲盛。魯公之從子。是爲文憲公柏。實學於黃文肅公。

幹以傳考亭朱子之道統。而敷文又受業於文憲。以及搗堂劉先生炎。雙峯饒先生魯。其學皆本於朱子。於是言道學者。推爲朱氏之適傳矣。維公之生。上承世德。相業之隆。道統之重。萃于一門者。家庭之所見。聞爲多。而累世文獻之傳。逮於其身。不可謂無所託也。惜乎不大顯融。不足以究其志之所就。然論天道者。謂王氏宜有後。而公侯之子孫。當必復其始。後之來者。尙有徵焉。銘曰。

大山穹林。良材所生。世家名閥。是生賢能。葵衣冠家。孰盛王氏。相業道統。聯徽襲軌。奕葉載德。委祉于公。公繼承之。文獻在躬。際今昭代。仍有祿仕。州世其家。克濟厥美。君子之澤。維衍益延。曷觀水木。繇有本原。斲石刻辭。爰誌陵谷。尙其嗣人。是似是續。

故處士金華王君墓誌銘

君諱蕙。字光庭。姓王氏。其先太原祁人。徙婺義烏之鳳林鄉。又自鳳林徙居郡城。凡六士。至宋政和間。有以進士起家者。曰登。卒官湘潭令。贈太師魏國公。於君爲七世祖。魏公之仲子。曰吏部尙書贈少師莊敏公師心。丞相魯國文定公之伯父。君之六世祖也。曾祖諱僑。迪功郎台州臨海縣尉。祖諱玟。將仕郎。父諱荇。入皇朝爲婺州路廣盈庫副使。君六歲失母。攀號頓踣。寢食俱廢。哀慕沒齒不忘。里中偶不戒於火。君年甫十六。兩詣家廟。奉遺像以出。他悉莫不顧。東軒書院祠堂。由始祖而下。不以世數遠邇爲間。咸合食。當屋壞弗葺。君繕完使一新。且割田爲經久計。先墓祭田。族人迭主之。春秋之事。或廢不舉。君爲修其缺。墜惟謹。念上世獨莊敏公有傳在太史氏。其後累世歷官行事。年壽卒葬。皆未之有述。將狀其實。請於時。

之聞人。有志而竟弗遂。君平居孝於父。友於兄弟。推以及其宗族。尤樂周人之急。篤于愛子。而訓誨甚嚴。臨終戒之曰。汝能以孝友繼吾志。吾死瞑目矣。君幼穎異。稍長受業儒先。尤精於音韻文字之學。有司以君善譯語薦於翰林。而君以侍養辭不就。遺榮自適。優游卒歲。未嘗以窮達動其意也。君生於至元己丑正月十七日。卒於至正甲申閏二月二十三日。得年五十有六。娶戴氏。子男三人。浩存。元功。漢章。女一人。許嫁曹道寧。孫男一人。女三人。其明年乙酉九月十六日。浩存等遵治命。奉柩葬金華縣婺女鄉槐龍里馬鋪嶺先塋之次。其葬也。浩存既刻石誌歲月。復介予友張君樞來謁銘。吾婺故宰相家。無若魯公之族。最爲蕃衍。衣冠奕葉。後先相望。至於運去物改。出而仕。今聖時者。猶彬彬焉。積累之素。固非一朝一夕。考其源委。則功烈著於當世。福澤被於後人。實自莊敏公始。德厚流光。餘慶未艾。而君謙冲退託。如弗克勝。與世浮湛。恥於銜襪。觀其孝友行於家。持身接物。始卒無疵。可以謂之全人也。奚必傳珪襲組。然後爲能世其家乎。銘曰。

大山穹林。良材生焉。迨彼斧斤。以保其天。孰終奪之。嗇不使年。樂哉斯邱。尙歸夫全。

龍泉章府君墓碣銘

龍泉章府君。以至治辛酉八月壬申終於家。後八年。當天歷己巳十二月己酉。夫人李氏亦卒。又二年。至順辛未七月庚申。合葬縣北西寧鄉古萊山之柯林。墓上之石。未有刻文。又十有一年。其子遇孫以狀來謁銘。予雖不敏。嘗執筆從太史氏之後。以文字爲職業。不敢以不敏辭。按狀。府君諱格。字元壽。姓章氏。其

裔出康州刺史鵬。刺史居泉之南安。未幾徙浦城。再傳至檢校太傅仔鈞。仕於閩王朝。其子若孫多顯融于時。章遂爲建之著姓。太傅第三子。檢校司徒仁燦。生校書郎文錫。文錫生都官郎中重。又自浦城遷處之龍泉。重生告生順。順生公探。公探生世安。世安生舉。舉生宗。宗生輔。輔生聞義。聞義生用之。則府君之高祖也。用之生強宗。強宗生煥文。煥文生斯立。則君曾祖祖父也。府君自高祖以來。咸不樂仕進。壹以儒術自娛。至府君尤能外去聲利。高蹈物表。白髮蒼顏。衣冠甚偉。見者皆指爲前代人。然不以弗仕而乖恤民之志。性篤嗜黃帝內經。甲乙靈樞之學。晝夜研劘之弗厭。多居善藥。疾病者。疔瘍者。咸走藥之而不求其償。或訕府君曰。行藥如行師。將非其人。則民生菹醢。子非世習。或證不宜藥。藥卽殺人。柰何。府君笑曰。君言固當。吾心將以己人之疾。非若粗工然。欲售醫以爲市也。彼蒼者天。君詎知不吾佑乎。閩井之間。倚府君以生者甚衆。果不違其言。府君孝友。出於天性。父齡逾八十。不良于行。雖多僂。府君朝夕給侍。左右未離去。父旣歿。奉其愛姬如母。人疑府君爲過。府君曰。父母之犬馬亦當愛之。況人乎哉。聞者嘆服。親屬有利府君多金者。數至豪奪巧攘。府君笑弗較。居亡何。又搆誣府君倚官勢而鉗劫之。府君曰。子何必爾。欲金當持去。又弗與競。於是大慚服。不敢復有所求。府君不嗜酒。每嘉賓至。必陳壺觴以爲燕樂。共談歷代治亂。纏纏如貫珠。聽者欣然忘倦。客或沈酣。擊節爲長歌。亦弗之厭。蓋府君局度凝廓。遇物有容。類如此。夫人出於宋之宦族。克相府君以成厥家。而所以奉尊嫜。和娣姒。飭子孫。又各盡其道。人有貨錢者。久不能償。輒勸府君焚其券。府君享年六十有三。夫人之壽視夫君而贏十有一焉。生子一人曰遇孫。

之聞人。有志而竟弗遂。君平居孝於父。友於兄弟。推以及其宗族。尤樂周人之急。篤于愛子。而訓誨甚嚴。臨終戒之曰。汝能以孝友繼吾志。吾死瞑目矣。君幼穎異。稍長受業儒先。尤精於音韻文字之學。有司以君善譯語。薦於翰林。而君以侍養辭不就。遺榮自適。優游卒歲。未嘗以窮達動其意也。君生於至元己丑正月十七日。卒於至正甲申閏二月二十三日。得年五十有六。娶戴氏。子男三人。浩存。元功。漢章。女一人。許嫁曹道寧。孫男一人。女三人。其明年乙酉九月十六日。浩存等遵治命。奉柩葬金華縣婺女鄉槐龍里馬鋪嶺先塋之次。其葬也。浩存既刻石誌歲月。復介予友張君樞來謁銘。吾婺故宰相家。無若魯公之族。最爲蕃衍。衣冠奕葉。後先相望。至於運去物改。出而仕。今聖時者。猶彬彬焉。積累之素。固非一朝一夕。考其源委。則功烈著於當世。福澤被於後人。實自莊敏公始。德厚流光。餘慶未艾。而君謙冲退託。如弗克勝。與世浮湛。恥於衒襮。觀其孝友行於家。持身接物。始卒無疵。可以謂之全人也。已。奚必傳珪襲組。然後爲能世其家乎。銘曰。

大山穹林。良材生焉。道彼斧斤。以保其天。孰終奪之。嗇不使年。樂哉斯邱。尙歸夫全。

龍泉章府君墓碣銘

龍泉章府君。以至治辛酉八月壬申終於家。後八年。當天歷己巳十二月己酉。夫人李氏亦卒。又二年。至順辛未七月庚申。合葬縣北西寧鄉古萊山之柯林。墓上之石。未有刻文。又十有一年。其子遇孫以狀來

子不相顧恤。政與妻賈奉病母陳益勤。終無他虞。政生德璋。處州青田縣尉。德璋生大和。建康路上元縣龍灣務提領。君之父也。龍灣厖疑端恪。有魯鄒士君子之至行。其司家事嚴而有恩。雖家庭中。凜如公府。子弟小有過。頰白者猶鞭之。每遇歲時。出坐堂上。君帥羣從子。皆盛衣冠。雁行立左序下。次進拜跪稱觴。上壽畢。皆肅容拱手。自右趨出。足武相銜。無敢參差者。見者謂有三代遺風。雖石奮家有所未及。名聞天下。自皇太子暨丞相諸公卿。多作大書及賦詩以美其行。部使者武威余闕行縣。以其孝友。七郡或莫之先。復豪東浙第一家。以褒之。蓋大和喜學。君益左右之。得一言必籍記而力行之。冠昏喪祭。壹從朱子家禮。而老子浮屠。悉罷弗祀。子孫從化。馴行恭謹。不知塵市涼薄事。執親喪哀甚。三年不御酒肉。食貨田賦之屬。各有所司。無敢私。凡出納絲毛事。有文可復。浹日則會。不公則監視發之。諸子晝趨功。入夜則聚棣華軒中。溫溫語笑。至更餘始休。雖列顯仕。不敢挾以自驕。諸婦但事女紅。不使豫家政。內外極嚴。輿臺通傳。不敢越堂限。然其所以致是。以龍灣親攬其綱。而衆目之翕張。則於君乎是賴。及龍灣采先世所行。定著家規五十八則。君復著續規七十三則。以補其未備。文多皆不載。初。龍灣無子。其弟心水府君文厚實生君。卽命爲嗣。甫十三。生母葛氏亡。毀瘠如成人。俄心水得羸疾。君晝則侍湯藥。夜則哭禱于天。或謂人血能治之。乃刺膚和藥以進。然病已劇。終莫能差。君雖出爲人後。而服喪三年。痛悼終身。但語故卽哽咽。不自勝。未幾。母周又病。復三度。藝頂灼臂以哀籲焉。卒賴以安。及長。撫弟妹。惟恐不至。未寒而與衣。先飢而推食。雖盛怒中見之。必欣然改顏。弟妹安之。不知身之早孤也。遇一家如一身。長幼有疾。一夜六七起。

女一人。錦川季源其婿也。孫男三人。曰珪、曰璋、曰盜。惟府君生於簪纓之胄。雖不出仕。以流聲問於時。然在家以孝友稱。其存心復以澤物爲務。揆於古者肥遯之士。亦若斯而已。如府君者。可使泯泯而無傳哉。是宜銘。銘曰。

澤則有蘭兮。山則有薇。我采我食兮。我佩我衣。銀黃雖貴兮。獲之或非。曷敦孝友兮。保家之肥。我民疾痛兮。況切我肌。完其熙醇兮。起其枯羸。人已一視兮。我道在茲。萊山鬱葱兮。有石如脂。昭幽廓潛兮。勒以貞辭。

青槿居士鄭君墓銘

至正癸巳秋九月十又六日。鄭君子敬卒於家。其子渙以冬十月二十又七日。葬君於浦江縣東三十五里閔子塢之阡。今年春二月五日。奉太常博士胡助狀來徵予銘。按狀。君諱欽。字子敬。姓鄭氏。青槿其號也。其先出後魏建威將軍曄。曄生中書博士茂。茂生白麟。有七兄弟。號七房。鄭氏皆多子孫。謂白麟之後不傳者。史失之也。白麟十六世孫宋欽。縣令。擬道。始自滎陽遷于欽。擬道子殿中侍御史自牖。復自欽遷遂安。牖生祕閣校理安仁。安仁生淮。又自遂安遷婺之浦江。今爲浦江人。淮生照。照生冲。素處士。綺。綺字宗文。通春秋穀梁學。撰穀梁合經論三萬言。事父母甚孝。父以非罪繫獄。當入死。綺上書郡守錢端禮。請以身代。母張病風癩。綺保持若嬰兒。但適廁必抱就之。三十年弗懈。教子孫不分財異爨。至今九世無敢違其言。朝廷旌之爲孝義門。綺生聞。聞生運。運生政。以孝謹稱。淳祐中大疫。有至滅門者。人恐惑。四奔。父

紀美揚休以屈後昆

黃文獻公集

卷之九下

四三七

或竟夕目不瞑。病勢稍減。津津喜溢眉宇間。族子可出仕者。資而勉之。至於已歸。不翅已得之者。與弟銖同掌義財。拓腴田二千畝。貯之嘉禮庄中。歲入其粟。以爲婚嫁之費。其遇疏族。則有續食之粟。禦凍之衾。允絕者。擇良嗣繼之。性敏者。營義方教之。至於卹異姓。周窮匱。又有推仁之財。免利之黍。嘗自認曰。民吾同胞。彼病吾病。彼辱吾辱。吾可不盡心乎。或陷危難。奮身救之。雖利害不顧。有紛爭弗決者。得片言則曲直自明。羅拜而去。愚氓無知。視骨肉如塗人。君至其家。開陳大義。至懇切處。潸然爲出涕。民多悔悟。自新君爲人外。雖嚴肅。而內多慈惠。尙氣節。英特異常。不能隨世浮沈。喜於聞善。勇於行義。遇事變通。如丸之轉。曾無滯留。苟涉過差。則批頰自訟。故人樂勸之。以善道云。有薦君才可用者。君力辭焉。家後有古槿大十圍。乃冲素處士所植者。君每舍其下。因以青槿居士自號。示隱操也。龍灣旣卽世。君哭之過哀。因以疾卒。壽僅六十三。娶傅福。字世昌。少房徐偉。字妙英。皆前君卒。同葬縣東二十八里之金村。子男五。溢、渙、瀛、汪、瀾。溢瀛汪皆夭。孫男三。桐、柎、旃。子家與君相去不兩舍。交君父子間者。凡三世矣。今年夏四月。龍灣以疾不起。子來弔哭。甫及六月。而又哭君焉。嗚呼。天喪吉何其忍邪。然君之二子。能以才猷自見。羣從子姓之賢者。又濟濟然各敦孝友之行。以能保厥家。則君雖亡爲不亡矣。昔者予旣銘青田之墓。今復從狀所述。備著君累葉之美。以垂勸於方來。復系之以銘曰。

猗歟鄭氏。世有哲人。君起繼之。孝友彌敦。九世同爨。罔間疎親。旁推其餘。卹我里鄰。榮辱疾疢。視同一身。苟用於時。澤將被民。旣弗欲展。修于家門。堂筵之上。煦如春溫。百世之下。善孰可泯。有崇斯阡。厥石維珉。

